

潮音艸舍詩存

林

森



潮音草舍詩存序

余喜讀方外詩取其平澹自然不事雕琢而信手拈來都成妙語能使讀者易契禪理也。太虛吾師博通三藏徹悟二空融會古今中外之學說適應時代機宜宣鬯佛法真理爲今佛學界之泰斗固不以詩鳴者也惟早歲親近八指頭陀與陸鎮亭易哭庵梁節庵陳散原陳石遺馮君木陳天嬰諸詩人遊會刻行昧盦詩錄比二十年則專力於教理之闡揚僧徒之作育過化存神其足跡遍國內外名山大川遐及歐美而短句長歌往往於舟舫車軼發之或通都或僻壤或林泉或瀛嶠皆抒寫其所至止之真情實景嘗曰吾之詩蓋聊以誌遊耳故不復綴輯余從散見於海潮音者讀之每覺精義洋溢奇氣磅礴輒爲之低咏高吟而不能自己昔海潮音十五週余旣於武昌世界佛學苑建潮音草舍爲師紀念卽從事蒐集師之詩偈漸已裒然成卷今臘月值師五十初度謀



刊布之以爲師壽師亦以可助其生平數十年之回憶不我固拒復因此集十  
之六五皆鈔自海潮音乃命名曰潮音草舍詩存云

中華民國二十七年雙十節後李基鴻序於渝州客次

勸音草舍詩存

太虛大師作 了空編 佛慈藥廠馮明政校

登太白山呈八指頭陀

丙午

巍巍一太白獨冠萬山雄  
雲壓金峨白霞蒸玉几  
紅松杉青掩映巖石碧  
玲瓏苦行感星宿深林湧  
梵宮鐘聲流遠籟花雨散  
遙空大法宏臨濟單傳繼  
少崧甬中稱佛地宇內仰禪宗  
棒喝誰能會諸方拜下風

遊玲瓏巖

危峯插半空巖石峙玲瓏  
煙樹迷春洞雲林送晚鐘  
鹿鳴青巘外猿嘯翠微中  
一段天然境優游興不窮

雨後同八指頭陀作

雨過秋山淨寒生夜月微  
老禪從定起渾欲着棉衣

圓瑛禪兄由天童寄詠梅詩至和韻答之

寒月照禪床清輝冷襲裳  
溪聲流日夜梅萼綻風霜  
未覩三分白先聞一段香  
禪心澹無著消息露堂堂

次八指頭陀聞江北水災韻

客自江北來未言淚先垂爲述災荒狀慘然異恆時斗金易斗粟一粟一珠璣  
眼看秋收至聊以慰衷私波臣復爲虐橫流淹沒之舍宅皆無存飄泊失所棲  
一片渺茫裏四顧絕煙炊哀哀懷中孩號號向母啼哭聲震天地死生悲別離  
死者葬魚鱉生者熬寒飢貿男并鬻女博得升斗貲隔日糧又盡空腸轉若雷  
輾轉殞溝壑誰爲掩其尸鬪饑棄荒野祇供禽獸肥斯民亦何辜上天胡不慈  
我憫饑饉苦欲化稻梁施嗟茲衆苦宅滿日皆瘡痍未能出三界低徊空自悲

山樓曉望

危樓插半空倚眺最高峯樹鎖朝煙碧山含旭日紅

松徑聞鐘

禪關五里植青松遠寺朦朧薄霧封獨有耳根無隔闕又聞送到一聲鐘

卽事

鳩喚庭前鵲噪林間誰算得定陰晴祇看太白峯頭上已積浮雲數丈深

入太白山口占

青松萬樹鎖禪關，迷徑樵夫入未還。修到白雲知幾世，尋常出沒不離山。

度夏天童寺

入夏苦炎鬱，安禪太白峯。懸崖千丈瀑，空谷一聲鐘。靜夜宜明月，芳鄰是古松。尋源臨絕巘，洗鉢一驚龍。

和昱山巖居韻

丁未

深宵定起欲三更，獨坐蒲團對月明。最愛石窗虛不掩，清光寒映佛前燈。

和八指頭陀月夜泛太湖

乘興攜禪侶，扁舟泛太湖。潮痕平兩岸，水勢匯三吳。月皓沙彌淨，風恬浪不麤。扣舷聊自詠，此樂世間無。

和圓瑛禪兄返閩韻

爲感秋空雁字橫，十年遊倦賦歸程。應憐聽慣他鄉語，反覺驚聞故土聲。遨遊不復計春秋，靜夜回思往事悠。贏得半肩詩卷返甬江，重取木杯浮。

兩岸蘆花照眼秋孤猿長嘯韻悠悠江楓搖落蘋蘩白夜泊扁舟古渡頭  
海濤怒作湧釜巒萬頃蒼茫眼界寬鷺島虎溪名勝蹟詩痕披當畫圖看

秋雨與昱山作

彫寥九月秋惆悵霏霏雨蕭瑟暮林寒蓬茸荒草腐傷將佛日蒙思揭魔雲睹  
聆彼滴無停惱人心最苦

重九登高與池蓮昱山同作

識得蒼狗幻浮生誠如寄忽忽光陰幾童年耄易至春冬秋夏四時時物景異  
重陽今已蒞佳節寧忍棄且爲引朋類躡屨破冥翠霏霏寒葉隊羣山如醉睡  
搜尋窮幽邃空谷驚魑魅行行巖岫次各契煙霞志嗟彼役名利辜負逍遙地

讀憨山夢遊集

寒月一輪天外墮等閑把斷死生條混融法界空諸有教義禪宗一杖挑

足成古句二首

遁世脩然脫俗塵優游惟與水雲親心虛不慕朝中貴道大寧憂鉢內貧千里

關山兩芒屐半瓢風月一閑身  
鮒于徐自適煙霞性往返天台雁宕頻  
汗漫九垓上踽踽已忘秋一鉢千家飯孤身萬里遊  
鮒裁雲持衲補渡海取杯  
浮了却看山願天涯足跡周

秋杪書懷

竹愈清臞人愈瘦吟魂憔悴詩難就  
堦砌寒蛩劇可憐嗚咽猶自鳴宵晝  
憶昔豔春候芳草成茵鋪錦綉  
炎炎盛夏時手摘芙蓉香滿袖  
秋來靈巖攀古桂野菊開巖岫  
而今一一凋零盡回首不禁生感嘆  
忽聞山鬼在旁椰揄笑嗤君徒探  
三藏妙幻境尙未知焉能窺玄奧  
不見云萬法咸從妄識薰變成種  
種顛倒相陰陽遷流寒暑分一切  
形聲無非自心之影響是以譬之  
乾城兼鏡象達者於此不追想吾  
聞其言確且切冷地回思思亦絕  
吁嗟乎物理榮與枯心外原是無  
迷頭認影枉爲境界風所驅莫更  
道木樨秋香芙蓉冬妍請觀天上  
月今年何減昔年圓

自題小影



十分相似幻耶真普印千江月一輪我不是渠渠卽我身離於影影同身幾時  
剃染成僧相何處丹青著色塵萬法了知皆意衆不妨呼作假名人

和圓瑛兄閩海舟次韻

偏覺月光今夜清披襟小立嫩寒生參差兩岸荻蘆白灼爍一江星斗明笛裏  
離愁吹不盡舟中淺睡夢難成每逢客路頻思返返得家鄉更悄悄

讀六祖壇經

漫道盧能不識丁壇經最著祖門庭講堂妙釋風幡諍終古光輝麗日星

寄陸鎮亭翰林用圓瑛兄韻

欣從箋錦挹清光綺似雲霞冷似霜儒雅風流近寥落唯公詩卷發奇香  
筆筦城髡硯積灰吟懷今被好詩催學他買鳥騎驢背一手爲敲一手推

偶成

灰飛葭琯又將春學道依稀未識真唯佛能知因念佛無塵可出始超塵夢中  
悟夢重迷夢身外非身恰是身漸已當前無一物白雲空翠冷相親

各有蒼蒼一塊天青巖冷抱白雲眠浮華我不懷榮辱明月何須計缺圓山裏  
尋山山含笑影中顧影影相憐虛空突出金剛眼覺後空空無大千

曉行

出門猶自問西東笑我無端入路中隔岸蘆花飛欲盡朝霞引著一輪紅

初晴卽景

浮雲散盡見峯巒煖坐蒲團任意觀竹翠松青無限景誰能收拾上毫端

冬暮舟過九折巖

一舸衝波上行經九折巖篙頭三尺濕峯髻一輪銜微韻生寒溜斜風橫片帆  
蒹葭盈兩岸望似白雲緘

舟中莫夜

滴殘更漏夢闌珊兩岸烏啼入耳酸起看繁霜白蓬背泠泠水逼一燈寒

舟過汶溪

野航過我此三回已是薰風欲放梅文種宅知何處是武陵溪色費疑猜一灣

水入山中去兩岸山移水底來轉憶前番秋夜好蘆花映著月明開

清溪晚眺

山癯皆露骨水冷欲生皮叉手風前立婆娑戰不支

和雲泉慨世詩

戊申

世亂乘桴浮海遊幾年鴻爪九垓周臨風一灑憂時淚吐氣將爲澤國湫寶劍  
騰輝無限意金甌欲缺不勝愁圖南未展垂天翼惆悵茫茫五大洲

卽事

今早雨還今晚晴涼堦唧唧亂蟲聲秋雲淡白山青紫且坐溪頭看月生

舟中卽景

獵獵風聲兩岸蘆碧溪清淺一舟孤斜陽影裏楓千樹半幅秋山好畫圖

聞蛩

寒月一窗初有光孤燈冷對坐昏黃短吟長嘯總無賴愁聽秋蛩鳴兩廊

深夜

獨坐寒宵盡寒宵忽已深一燈冷相對惆悵去來今

秋曉

簌簌風生北曈曨日出東空庭聞木落秋老寂寥中

送別

大江秋老雨絲絲偏是別離逢此時看到渺茫雲水闊征帆幾片順風吹

中秋

一生能有幾中秋應對月明捐盡愁數點殘雲斷不續碧天無際望悠悠

答惠敏

望斷吳山一髮青詩筒遙寄若爲情教人最是銷魂處寒雁月明三兩聲

秋菊和僧度韻

但向霜籬敦晚節不同桃李鬥容姿後彫豈獨推松柏木落林空乍放時

遊虎丘與吳中友人同作

踏遍山隈又水隈梅應笑我鶴應猜虛空世界渾無住領袖文章不易才天女

散花何處室生公點石此間臺而今一覺繁華夢慘澹斜陽照古槐  
寓甬江東用前韻答吳中諸友

遯跡安然不自猜禪關近築甬江隈遙望日落登高閣爲看潮生獨上臺唯是  
我人能愛我是真才子解憐才得君俊逸清新句月下沉吟倚古槐

偕惠敏善亮遊鷄鳴寺

己酉

春風弄衣袂得得一登臨龍種欲何覓鷄鳴且共尋臺城一悲古世界幾回今  
不見月湖月惟聞流水音

掃葉樓題壁

莽莽神州此一樓憑欄須是最高頭三山隱約窺天外萬里蒼茫入眼悠牛斗  
已無王氣射禹疇空有亂雲浮登臨恍讀傷心史遙對暮愁無限愁

秋江晚眺

江上一爲眺江干爭渡喧日沉帆倒影潮落岸留痕楓老丹霞映波晴白雪翻  
薄寒憶歸去燈火見前村

壽八指頭陀六十

幾經吟座拜翩翩染得衣香久更鮮黃面老今年六十白毫光滿界三千偶從  
禪意得詩趣不住中流况兩邊八指名成壽無極恆河沙數未能詮

清溪曉坐

庚戌

一片迷離斷後魂可憐欲覓已無痕心香縷縷難爲價識浪微微別有源度世  
偏宜成石佛前身應是侍祇園根塵恰似空華歇獨向清溪聽曉猿

偕棲雲由滬赴粵舟次

九死癡魂還作夢一生知己不多人句借豈無大澤名山隱何事輕塵軟浪親幻  
海飄蓬餘結習亂雲籠月見精神齋將萬斛明珠淚槁立斜陽獨笑顰

長壽寺爲羊城巨刹今沒爲市廛遺趾猶有可辨賦此誌感

可憐煙綠塵紅市舊是談空說有場長壽不堪成短命幾回經此涕淋浪

羊城光孝寺六祖髮塔及風幡堂在焉今大半淪爲茶酒之肆愴然有作  
風幡非動鏡非臺一物都無是本來五葉靈花開已萎誰能培此舊根芽



贈別

悠悠一遙別落落兩無言不向江干送怕聞江上猿

和毋楚愚金陵懷古

不堪回首大江東霸業空餘氣尙雄千古廢興歸野哭九州吹息盡雌風腥羶未許靈波滌天地終遭毒霧蒙一片河山殘照裏好看無奈不禁紅

白雲山能仁寺小憩

花木蔚然處禪房空氣清閑閑疏影動脈脈嫩香生彌喜嵐光淨微聞流水聲此間信幽絕小憩足怡情

安期巖聽雨

微雨濛濛濕石樓坐聽岳溜泣神州無端百感茫茫集苦語哀思不自休

登白雲寺樓題壁

一樓大有蒼茫意萬樹高參蔚藍天此是白雲最深處狂吟驚起老僧眠

和哭庵居士見贈原韻二首

太虛如太虛那怕白雲掩太虛如太虛豈畏紅塵染  
青山宜白雲重重爲之掩紅塵飛不到何處得相染

隨易哭庵汪澹甯盛芟船金芝軒周檢齊張伯純于明若諸公遊鄭仙巖  
再疊前韻

青山遙相映白雲低相掩行過巖縫間衣上蒼苔染

登鶴舒臺

一自成仙去名山鶴有臺白雲迎客掩丹桂傍巖開鑄此靈奇境應窮造化才  
一亭秋寂寂煮茗共傾杯

戴君藹天爲卜葬地至雙溪賦贈

粵海仰喬木空山幸識荆林楸奇氣鬱叢桂妙香迎清淺雙溪水潺湲萬古聲  
斜陽澹秋草何處卜佳城

歸雙溪寺

鵝泣山中月龍蟠天上池遊當秋寂寂歸合夜遲遲巖石坐忘世溪雲吟入詩

寒蛩苦鳴咽應亦爲悲時

和秋澄重宿雙溪寺韻

脩然重向此徘徊詩興遊懷兩未頽  
溪水潺湲流似故山林蔥鬱氣佳哉  
百年陳夢三生石一片斜陽萬古懷  
料得秋風憑眺裏白雲黃葉總成堆

宿景泰寺

智樂三藏開山

如此長風未可乘祇宜高臥白雲層  
霜鐘韻破深宵夢石壁光生古佛燈  
曉色寒凝千疊翠月明曾照六朝僧  
他年縱有盧行者手植菩提愧未能

盧祖梅庵

不見梅花影蕭蕭葉落亭鳥歸飛更疾  
山睡看還青宿雨欺殘菊靈風度古馨  
袈裟一角地四顧獨惺惺

舟過羚羊峽

峽入羚羊若筦窺舟吞摩竭費疑猜  
平平過去初無險細細端詳亦大奇  
兩岸芙蓉青綽約一江細綺碧參差  
看山要有看山眼徹骨還須不損皮

鼎湖蓮洞

窈窕蓮花洞溪聲靜裏聽峯晴雲暮白地煖草冬青積翠侵衣冷回飈帶虎腥  
憑欄默然坐無語對山靈

白雲山講經

辛亥

漸到雲深處微溫靄曉瞰峯高積寒翠松老露奇根色相皆空相無門卽是門  
鐘聲生滅裏溪水自潺湲

安期巖訪梅

向陽纔見數枝開便把春光漏洩來得氣獨先天地物託根深在水雲隈冰肌  
玉骨花魂瘦冷月尖風鶴夢回忽憶西湖林處士吟肩寒聳幾低回

慰盛侯季瑩哭弟

不堪交臂已非故可奈回頭歲又新容易光陰客中過最難兄弟老相親尋常  
啼笑紛哀樂漸覺悲歡隔夢塵且共忘情遊物外眼前惜取白雲春

邀汪公萃伯遊白雲山疊前韻

桂香猶記染衣巾又見寒梅照眼新高士倦拋青史臥野人閑與白雲親乾坤  
夢裏驚棋局涕淚樽前灑麴塵溪上好花開恰半且來同賞早遲春

答僧度感懷

翩翩散去憐飛鳥落落相看惜曉星閑狎白鷗忘歲月遙觀紅日浴滄溟無心  
石女春難動入夢金仙睡欲醒莫向色聲邊上覓性天風月本無形

明月閑敍

瘦月緣山上寒蛩伏草鳴暗香窗外滿虛白室中生坐久衣微冷談深語倍清  
輕風颯然至天籟雜吟聲

摩星嶺晚眺

萬仞峯巔獨嘯吟餘音散入海潮音寸心漸共孤雲遠隻手舒援大陸沉陌上  
人都歸日落天涯客不畏風侵班班點點翔空際莫辨山禽與水禽

春日漫興答哲迹

夕陽紅褪近黃昏遠遠青山淡淡痕細草芊綿霽春色和風駘蕩養花魂臨流

漫動匿王感聽鳥休因望帝冤閒恨閒愁自朝暮暫能歡樂且忘言

贈濠隱七律五古各一首

溪聲落落無今古山色悠悠自舊新  
蒙叟道窮天地闕坡公心與物民親  
精魂各有三生石世界誰憐一聚塵  
獨抱杞憂濠上隱渾忘花月滿簾春

粵山繞珠江碧螺纏銀練映作琉璃色  
畫出芙蓉面玲瓏安期巖莽蒼越王甸  
鶴舒昔曾登雙溪乍相見分明舊精魂  
重向石上現吟心與禪心渾然成一片  
秋高又春深往來願忘倦

偶成東久絃

乾坤白茫茫古今青濛濛光明聚千星  
風雲舞萬龍豔豔熒熒春桃李淒淒清  
清秋芙蓉黑自爲烏白爲鵠曲自爲棘  
直爲松平等社會一羣蟻專制帝國一  
窠蜂經綸世界憐巧蛛肥遁皋澤悲寒  
蛩物各有知能物各有蔽封腕上慧劍  
皆現成羅網重重當決衝

速梁節庵江霞公遊白雲山



乾坤可愛是仙才  
澗畔青蒲掩綠苔  
三島十洲渺何處  
蓮花臺對鶴舒臺  
山上白雲輕似絮  
溪邊青草淨如茵  
春光不獨晴時好  
細雨微風亦可人  
疊嶂層巒澹碧環  
滿山花正半開間  
十分春色全留住  
寄語坡公且往還

讀哭庵丁戊集和醇韻二首

四海名花釀酒醇  
修羅一飲醉千春  
冷雲盡化纏綿雨  
酣夢偏多涕淚人  
山外溪流有清濁  
瓶中粟米雜新陳  
支離破碎逢今日  
欲率天民作地民  
乾坤一榼酒清醇  
萬古千今醉裏春  
卓爾立時渾有物  
塊然忘後更無人  
風雲日月天仍麗  
禮樂詩書迹盡陳  
滄海桑田經百變  
應憐猶是葛天民

春曉雨晴

萬壑煙嵐靄曉窗  
四山晴黛鎖珠江  
微風吹縐池塘水  
脈脈春寒未易降  
樹樹葉藏啼鳥綠  
山山花放杜鵑紅  
白雲不鎖東西路  
付與遊人自在通

贈雁峯柏師

造化洪爐多神奇  
不拘一格鑄人才  
擎頭戴角英靈漢  
法界遊戲時往來天上

羣星拱北極山川佳氣匯南臺七十二峯各雄傑雁峯實爲五峯魁聞道雁峯  
壽佛寺異蹟尤稱世所稀壽佛乃是彬州產一登衡霍心地開自性寶藏用不  
竭神功聖德般般齊一旦因緣時節至潛輝幽光揚太微金剛倒作金剛陀柳  
標橫擔頭不回東州全州無定踪彼岸此岸兩俱離一去全州尤奇絕河流能  
塞山能移消息悠悠迄今日五百再來應符期乃有柏公天人師生稟巖巖超  
世姿唯茲法運浸衰日披袈笑挽頽波頽重爲山靈增顏色紀物誌事徵歌詩  
興懷前賢啓後賢恢恢鴻業振古垂

和柏公原韻

壽佛宗風自一家名山勝事總堪誇月臺塔玲瓏遠煙雨彌空罨墨遮春滿  
瀟湘長青草日生滄海吐紅霞衡峯七二饒佳趣宛似芙蓉朵朵花

次易實甫昌華小榭題壁韻

破浪乘風百粵遊白雲深處小勾留廿年塵世愁無限此日新愁倍舊愁  
高山流水吟長短紅日白雲空去來貿貿一春無好意歡顏暫爲讀書開

酒人顏色半紅醅大野高原夕照多如此江山且歌哭料應無奈落花何  
讀屈賈列傳

天生天殺大難才珠璧相投竟見猜灑盡傷今懷古淚後人還爲後人哀  
我畏多才甚不才不才能免世驚猜靈均滅沒長沙天造物生才大可哀  
雜感

孤懷欲伴蒼松老舉世唯宜白眼看占得湖山供嘯傲瓦甃不易水晶盤  
書劍聚成千古淚英雄都化兩間塵從今刪卻閒愁恨臥看荒荒大陸淪  
孤吟斷送春三月萬事都歸夢一場護取壁間雙寶劍休教黑夜露光芒  
月影波光兩不侵五湖烟水寄閒吟松魂鶴夢渾無著賸有悠悠獨往心

答鄧爾雅

日月拋人急風雲入世深江河空浩渺山嶽自嶸嶸佛性不生滅英雄幾古今  
爲憐天亦老應有杞憂心

遊海幢寺

法幢何峻偉高出海雲顛雨滴林間翠晴凝江上煙奔騰慕龍象飛躍羨魚鳶  
太息成寥落人天兩黯然

移居江西別墅

數級石通仙館閣一泓泉擬小蓬瀛斜風急雨初晴後坐納新涼水上亭  
笑以焦鵝占一枝大難身世費支持祇憐得共神仙住苦雨淒風也自宜

漫感

微風細雨釀餘寒花落春歸路未乾偶共片雲江上駐最宜圓日海中看浮生  
歲月蹉跎易如此乾坤進退難寄語魯人休也便一般蕉鹿夢須殘

月夜不寐疊前韻寄汪公篤甫

雨時猶帶一分寒炎夏方長未易殘遠客偏多愁裏感故鄉祇在夢中看年來  
卻爲嚶嚶誤此際真成去住難別有憂思眠不穩非關月影上闌干  
人間溽暑又嚴寒易葛移裘總覺難劍作龍吟亦徒爾夢如螺旋未能殘一天  
星斗明明見滿地胭脂默默看萬種愁懷誰遣得曉猿啼徹大江干

題景吾所作屈原澤畔行吟圖

蕭瑟湘波憔悴人，  
煮蒿悽愴二千春。  
由來造化難天問，  
何事哀吟嘆不辰。  
浮生宜狷亦宜狂，  
怕讀離騷末後章。  
澤畔於今復何有，  
秋風衰草澹斜陽。

崖門弔古用陳獨漉原韻

斜風橫雨不勝吹，  
沉碎河山萬古悲。  
喬木蟠龍思故土，  
落花啼鳥愴空祠。  
甘心銜石同精衛，  
忍死餐薇孰伯夷。  
夜夜怒濤驚拍岸，  
停舟垂淚獨尋碑。

粵友言別

說別真成別，言歸今始歸。  
無端來復去，不識是耶非。  
歲月身如擲，風雲手懶揮。  
千峯萬峯頂，長嘯一沾衣。

普陀懷馮君木居士和原韻

平生弈弈飛動意，欲決滄海回橫流。  
忽逢慷慨悲歌士，各有沉淪破碎憂。  
力弱難援天下溺，心孤遑恤衆人仇。  
別來思子不可見，望斷蒼茫雲盡頭。

般若精舍與湛庵昱山同作



不入塵勞境不融聖賢仙佛一般空高天廣地微茫裏萬古千今夢幻中心鏡  
虛明非拒物耳根圓徹不妨聾欲憑海水爲喉舌吐抱傾懷一折衷  
功到洪鑪點雪融矯然鸞鳳翅摩空青山不逐浮雲變羣象虛涵碧海中如此  
波濤喧宇宙要憑霹靂振頑聾慧光不返娑婆照誰慰殷殷古佛衷

酬印光法師

日月回互照虛空映還掩有時風浪浪有時雲黯黯萬象恣妍醜當處絕塵點  
雖有春秋筆亦難施褒貶  
餘霞散成綺虛空忽暵染恰恰紅塵漠恰恰青天湛悠然出岫雲無心自舒斂  
泰山未嘗增秋毫未嘗減

聞錫麟了公述因

佛身集無盡證入法華禪聞性聲常住靈山會儼然彌陀離念得極樂自心圓  
何必破顏笑袈裟誇獨傳

續昱山千步沙晚眺詩七韻



良日攜知己行行千步沙涼颺動衣角人影落濤花此樂真無極山高水更賒  
奇峯疑疊浪松老布重杙境勝渾忘俗泉清可煮茶梵宮疑遠翠綠樹映流霞  
遙指濃陰處疏鐘古佛家日臨波似錦風到水如紗叢柏參天立林樾夾道遮  
昱山忘情狎鷗鳥杜口擬毗耶不識青牛氣羞乘白鹿車爲天憂老大與海門  
豪奢神理薪傳火玄機兔脫置江山恣游眺瓶鉢足生涯漫索枯腸句當彈卻  
手琵琶遲遲一來去歸路夕陽斜

寓錫麟禪院自題所居樓曰萬綠軒系之以詩

萬綠悠揚翠靄空嫩黃几上列羣峯陰濃晝靜渾無事抱膝長吟樂此中  
葱籠佳氣裊晴空深碧池塘淺黛峯月滿簾櫳花滿樹此身疑在翠屏中

次韻答黃鶴山人

數載愁顏一旦開千年重見遠公才堂皇幾坐菩提樹談笑曾登般若臺高蹈  
還殷入廛願前身應是浮居來自慚羽弱飛無力洙泗頽波挽未回

昔慈山以曹溪

入塵垂手幾秋春閱世雙眸久更新諸佛不離生死際滿街都是聖賢人六傳  
正法祇衣鉢百丈清規及米薪應是蓮花淤泥裏在塵不染倍情真  
未能相喻不言言默爾潛消萬劫冤舉世方隨雲變幻幾人深見道根源微茫  
淺霧籠新月黯澹斜陽照古原禍極天心猶未悔沉沉大陸待誰援  
中原破碎復支離不幸人生值此時靈運中年感哀樂東坡老筆雜歡悲陰成  
綠葉嗟無及絲盡春蠶不自知猿鶴沙蟲憑變化伴君黃鵠且吟詩

招寶山望海

海天此雄鎮風浪拍山高浩蕩一樓古登臨萬慮拋巒光橫戶牖雲影臥波濤  
脈脈斜陽裏微聞鐘磬敲

太白頌八指

德本多生植禪風一世高性須緣起盡心肯有情拋願力超儕輩慈懷靖怒濤  
高吟起沉寂松下細推敲

寓愛儷園與白慧同作

南風愠解百憂襟  
品石評花喜莫禁  
濁世不期逢淨土  
塵中何幸獲知心  
清遊細賞名園勝  
小住同爲擊鉢吟  
無限情懷誰遣得  
空山流水怕聞琴  
林泉祇合滌煩襟  
何事臨風悲不禁  
萬樹蟬聲身世感  
一園秋色古今心  
詩成白壁難爲價  
腸斷青山獨苦吟  
邈矣中郎不復見  
誰從焦尾識奇琴  
碧沼青林愜素襟  
孤懷渺渺意何禁  
江山不盡蒼生淚  
巖壑彌傷赤子心  
荷蓋瀟瀟來夜雨  
桐陰寂寂寄秋吟  
乾坤落寞人天老  
入世當彈霹靂琴  
涕淚縱橫百衲襟  
英雄氣沮最難禁  
不存佛見况生見  
強說禪心勝俠心  
簷溜有聲添客感  
松濤無限作龍吟  
成虧何與漆園事  
苦爲昭文論鼓琴

愛儷園閒步

竹猗猗外草茸茸  
水榭風樓幾疊重  
更喜清音慰寥寂  
蟬聲濃似樹陰濃

愛儷園贈別白慧

竹木參差路易迷  
柳依依外草萋萋  
逢君卻喜秋風健  
似我真宜陋巷棲  
玄理偶於無得得  
物論須是不齊齊  
天涯異日重回首  
應憶輕鴻爪雪泥

贈小隱 卽烏木山僧宗亮

萬卷圖書萬疊山，抗心千古絕援攀。  
人天各有蒼茫感，悽斷秋聲暮色間。  
風雲出入未蒼顏，壯志曾窺豹一斑。  
懷抱古今誰盡得，南陽高臥自閑閑。

天童秋晴晚步

秋蒼暮翠掠衣寒，滿地蟲聲各楚酸。  
積雨新晴雲尙亂，石橋小立聽飛湍。  
隨侍天童入指和，尙將有聯全國佛。  
徒北請護教之行。

秋雨初晴佳氣增，松陰三里侍陪曾。  
攜將太白山頭月，要續玄黃佛性燈。  
法運能回憑大願，楓宸得達幸中興。  
澄清局定歸來日，高臥青雲第幾層。

重至西方寺贈昱山

往返何憧憧，離合何匆匆。  
等閒一爲別，等閒又相逢。  
憶曾與子此，閱經聯吟夜。  
守孤燈，青那堪，南北東西後鉢囊。  
書篋仍飄零，幾年贏得髮種種。  
胸翅腹刺愧，且悚德未加，修業未進此。  
外甯足較輕重，坐破蒲團，浪費草研窮。  
三藏空數寶，骯髒人寰落，倒頻人心何心。  
猶羨早惟君，皜然出塵滓，物外逍遙清且奇。  
碧梧

玉溪高士魂寒松瘦竹幽人姿相向話舊雨繾綣不覺夕陽紅一線楓林遙映  
疑桃紅疑及桃花羞人面吁嗟乎虛空奚故有天地天地生人復何意孰主張  
是孰綱維顛之倒之母乃戲

贈湛庵歸普陀

又泛輕舟去水汀秋風聚散悵浮萍林巒薄暮煙微紫蟋蟀征宵草尙青海國  
應憐人窈窕天涯怕看月娉婷此行遮莫增離思珍重黃花晚節馨

重遊慈邑觀音寺

林巒卻喜此幽深兩度來遊興不禁萬木蕭森餘態好九秋風雨峭寒侵遙聞  
漢水繁生殺乍聞武昌起義只盼中原早起沉笑我人天忘管帶隱山未解采微吟

秋夜對月

蟾光澹澹抹闌干風露淒清秋水寒獨木趙州橋一座度驢容易度人難

秋菊

木葉下茫茫秋籬菊始黃孤標傲羣卉勁節耐繁霜桃李羞同豔芳菲冷自香



西風颯寒袂幽賞又殘陽

懷澹寧道丈

傳聞棄官入羅浮

寂歷幽扉鎮日扃天痕薄暮壓蒼青  
三杯白酒忘身世一卷黃庭養性靈  
秋月滿軒吟菊頌春風半席檢茶經

借聯

料應太息人間世自鼓瑤琴祇自聽

同錫麟了公報恩自公訪赭山心愷長老

古寺禪林曲徑通偶隨飛錫入雲中  
松篁薄暮深深翠木葉經秋澹澹紅  
倍覺山明兼水秀轉因天巧施人工  
品題不少名流筆高曠遙追懷葛風  
鐘聲悠邈隔林通寺在深蒼密翠中  
水自土中流出赭霞飛天未晚來紅  
人間此地高禪隱海內同稱書法工  
鳥語啁啾雜清梵匡廬蓮社有遺風

養疴寧波觀音寺

徧覓身相不可得知誰痛癢  
養誰疴四蛇忽爾爭專制一篋騷然失共和  
我佛多情談般若衆生不覺病維摩  
觀音枉有圖通耳無奈人間曠曠何

寄君木居士用前度韻



吾喙三尺天難訴零涕空溢寒江流幽抱不關謝塵事苦茶無力解奇憂腐骨  
何妨齊舜跖文心容易鑄恩仇丈夫存想應空闊那許青絲坐絡頭

釣魚臺訪古

空聞釣魚臺湮沒不可見寒江嗚咽中獨立深繾綣

漂母祠懷古

淮陰落魄孤窮日胯下歸來黯斷魂漂母一雙千古眼獨從寒苦識王孫

詠淮關篆香樓木本玉蘭花次淮關道程商霖韻

渺渺清淮此一樓神州在望鞏金甌

時淮城方光復

甘棠自是多遺愛勤政偏能作

雅遊載酒看花饒逸興佩蘭紉蕙憶前修我來恰喜方含蕊空際紛紛香雪浮  
駐將玉貌千年好應較璫花一現強葉葉皆成青色寶枝枝齊放白毫光春深  
往往香如海夜靜溶溶月滿廊風雪來遊寒正酷待時無限惜芬芳

淮江舟次

夕照乘明月悠悠一舸過茅廬  
如比櫛土屋滿長河流水江南活平原淮北多

此行未辜負得句且吟哦

車經龍華站口占

壬子

桃花如海向人紅便欲和車住此中機笛一聲飛似去最憐回首已朦朧

登平湖報本寺塔

良日攜勝友清遊破寂寥數峯橫遠近一塔聳雲霄高覽窮天地幽居絕叫囂  
微吟入神理胸次自蕭蕭

當湖泛舟

湖心有瀛洲書院

扁舟劃破湖如鏡共向瀛洲覓勝來堤柳臨風不禁舞池蓮含蕊待時開遠山  
隱約登樓見近水容與繞院迴遊興吟懷俱不淺留連相與久徘徊

甬江重晤會泉禪友

一世風雲舞萬龍甬江何幸故知逢年來縱脫真無狀陡憶森森太白松

赴鄞西接待寺訪圓瑛兄途次

春色欲歸歸亦得我心如醉醉無依垂楊堤上綠千里桃樹枝頭紅已稀

別聊叟

漫從離合動悲歡境變情真興未闌獨抱孤懷不求訴經多奇險轉忘難聊將  
愴惻纏綿意強作疎閒放達觀他日入山重有約與君同當夢痕看

懷故人詩八首

湛庵禪長

去年於此日白華一笑逢狂名昔曾識清誼便相濃肝膽有如鏡合離無定蹤  
頗能略形迹令我思俞鍾

明微論師

孤光矚玄閔高蹈自奇矜愛我意偏摯真理期共尋也憐今日事有負故人心  
那得清溪上重披明月襟

琴志樓主

一世驚才大千山共壯遊魯連高蹈海王粲感登樓瓜却明州暑詩吟粵秀秋  
匡廬有精舍歸隱與誰儔

豐城劍人

詩心秋水澹劍氣暮虹飛元詠冥神理高懷慕采薇書藏星宿海香染芟荷衣  
憶昔憑將護溫存意入微

澹寧道丈

吟髭清可數仙骨幾生修異地隆鄉誼珠江厭宦遊忘情參太上有夢入羅浮  
應與梅庵李同爲第一流

君木居士

最憐乍相見深談不覺多熱情溢顏色奇語入詩歌論世餘憂憤交人慎涅槃  
迢迢一問訊消息近如何

心薇畫哲

妙畫寓至理華嚴悟法門獨從色塵界深究道根源救世心殊苦平民說永存  
橫流汨天地憑與息奔騰

尙同文俠

不是聖賢死那得盜賊止我意尙無爲唯君同所喜別來一年餘精神常注此  
大地無町畦何妨隔千里

宿舟中和張天放韻

豪氣雄懷漸已無祇餘吟思滿江湖臥看天上走星月默識生前舊路途狂聖  
說興情易僞東西人倒醉難扶可憐今後益寥落不見屠沽有丈夫

題壺

垂天有翼壯南圖高舉還須積息扶好把風雲珍重待冰心如月貯銀壺

秋夜枯坐

四壁秋蛩漸有聲小樓寒氣襲衣生神酸意楚渾無賴苦茗盈杯獨自傾

偕鐵崖暮抵越城

秋水澹搖千里碧暮山遙逼一城青扁舟破浪浮來遠良友歡諧笑未停非有  
古懷探禹穴更無襖事集蘭亭但將慷慨悲歌意偶向黃墟寄獨醒

心喪八指頭陀二絕

相隨學道白雲層  
捧喝當頭領受曾  
從此更無師我者  
小窗垂泣淚如繩  
萬樹梅花竟埋骨  
一輪明月孰傳心  
遺詩自足流千古  
翠冷香寒憶苦吟

嘉善東園張天放同坐

武水古名地文明昔所稱  
深談有同調小住雅相應  
曉日融殘雪寒塘解薄冰  
東園閑向煖恍若夢遊曾

歲除

千秋萬古除俱盡咄咄今宵歲  
又除只不乾坤之道息偕亡  
物我以心虛生涯  
草草勞看鏡世界花花誤讀書  
無語那堪窗漸白凍梅渾欲向陽舒

春宵感事與玉皇式海同作

癸丑

峻峻怪石靜如佛點點春山淡  
欲無漫道元龍有豪氣偏宜象罔得  
玄珠潮流滿地來新鬼荆棘參天失古途  
最是令人思不置雪山深處一窮夫  
從來般若原非有最是貪嗔不可無  
顛倒乾坤見魔力總持凡聖此靈珠  
圖南漫作鯤鵬變成佛當行鳥獸途  
忽地橫刀向天笑萬星今夜屬狂夫



別江西光孝寺大椿

暫得春申十日聚別君竟去我何心豈真離合有天意欲遣悲歡成苦吟護教殷勤見宏抱容余疎放亦知音此生未便相忘去好共廬山面目尋

同呂重憂由滬赴杭車中口占

一片難尋乾淨土同車幸託好良心養疴賸有西湖好山秀波明古到今

西湖孤山

久羨孤山勝蹉跎始一遊梅宜新月映鶴共暮雲收啼鳥迎人立清泉繞石流高僧與高士風韻此長留

高僧指孤小圓師

由道村轉唐莊

唐莊幽秀道村新都是未漓天趣真湖水淺深山遠近憑臨處處總宜人

遊靈隱寺

棄舟共登岸乘興恣幽尋古寺潛靈隱名山豁我襟蒼巖勒羣象一線透天心驟雨來林際溪聲助小吟

三潭月影

林浪涕淚平生感破碎湖山烈士墳到此未能坐忘去卻從潭影玩天痕

雷峯塔

吳越無王已千載南朝遺蹟尙縱橫巋然五級明妃塔留得雷峯夕照明

岳墳

皇皇壯語轟天地痛飲黃龍酒一杯豪氣到今莽飛動豈徒廟貌供人哀

遊湖心亭

湖心亭外翠煙浮千里何曾負此遊四面青山憑眺裏料應解盡重憂憂

偕楊一放王芝如楊紫林釋卻非泛舟遊石屋

稽山青濛濛鏡水碧悠悠驟雨送新涼雲氣同奔牛乘興攜知己適彼莽蒼遊  
扁舟泛容與款乃櫓聲柔放浪形骸外談笑聊自由石屋洵幽絕遺跡供尋搜  
寂寞安禪地林翠擁佛樓諸子皆彥俊能先天下憂社會本無性習俗相沉浮  
終當捨羣擾濯足滄海流

贈鄞東大善寺授濟杜多

如此宗風掃地時衲僧何幸有吾師閒從畫裏存天趣

工繪關帝像

偶值禪餘詠

史詩貌頽骨剛神自足經行長坐老忘疲蒲團一個紅塵外嗒爾知雄以守雌

疊前韻贈大善寺主識川

絕技神拳噪一時南洋多士慕從師

曾授拳術南洋公學

羨君別具過人力愧我空吟慨

世詩入定江天絕塵擾隨緣大善殫勞疲當機殺活渾無事垂老英雄劍未雌

題自真禪丈華嚴閣

蕭然斗室淨無塵光滿琉璃月滿輪法界重重帝珠網玄關寂寂谷神津蓮花  
經罷千聲佛菱鏡臺空萬化身奪境奪人渾不二相逢語默總天真

頌揚州天甯寺主銘簾六十

五陵佳氣今猶昔十丈瓊花開又新秋桂香中添鶴算曉鐘聲裏證蓮因華嚴  
此地曾初譯僧校當年憶最真不信人間有消長靈山原是四時春

微意兼贈穆穆齊

物有俱生情曰我愛我慢我愛屈我慢遷客悲鴻雁我慢屈我愛達人齊鵬鷄  
茫茫宙合間萬象同誕幻種識成瀑流吾身尤大患經世親所嘗無往非破綻  
長風寥寥中飄墮蓮花瓣溷園與繡茵美惡何裝扮隨分納此些些往來絕追諫  
青山籠浮雲漸亦幽間憤嗒然我喪予愛慢盡烹餗徒勞明珠投不爲按劍吟  
喙鳴天地合隨順語謾謾天地合喙鳴莫逆視曖曖

題君木居士逃空圖卽次原韻

衆生不至盡成佛三毒未可連根拔色聲紛爲增上緣哭罷落花哀秋蟬一間  
之隔亦何遠曠劫可憐空追伴狂心只愛鏡中頭舉世茫茫貉一邱夫子乃以  
一遁了嗒焉若喪更無求嗥益不噉能兒子因其固然順其理琉璃天籠芙蓉  
山別有意境非人間蹴踏堯聖追務許不管大陸走狼虎

訪陸鎮亭太史以詩文集見贈閱次依原韻書懷

閱世祇令雙眼冷孤吟肯共寸心違都無可意奢遮物賸有蒙頭破納衣一壑  
松濤寒謾謾萬山雲氣曉微微築關坐斷未來際好與人間絕是非

贈聖根卽次原韻

萬法唯心古佛宗妍尋且喜得相從穠華漸覺人情幻淡泊方知道味濃容易  
少年成老大最難交久禮彌恭何時共向深山住靜看秋空雁影衝

疊前韻寄佛佛

盡捐塵累入空空灑脫唯應一鉢從佛說原知身外妄閒情偏向境邊濃憂天  
汝亦能多感玩世吾真大不恭倘得同心重懺悔好將生死網羅衝

答玉皇

閒坐沉吟日又昏夕陽紅映野人門尊前涕淚增秋感劫後河山賸夢痕救世  
君猶多壯志問天子已欲無言祇期珍重好身手留待旋乾與轉坤

疊前韻贈別古潤

未老誰憐志已昏聚談祇盼過柴門無情別夢人千里最感窺窗月一痕倘得  
鳳凰重出世肯爲鸚鵡獨能言萬年末法君須記珍重靈鰲負大坤

贈佛嚴佛耀佛曦

同向鷄峯五體傾最憐難弟復難兄優曇再現期三佛煙水休辭過百城吾教  
人才慨秋落僧園種草喜春榮嗟予十載空無就不覺叮嚀倍有情

答赤城散人式昌

山寒林翠薄對月一調箏落拓窮途阮高幽處士彭都無媚世骨偏有愛才情  
海內誰知己晨星數點明

贈方粹彥次原韻

未能成佛且成仙此日看生醉裏天病影婆娑增斌媚吟聲激越轉清圓不妨  
世諦論三五無礙心經字半千便欲攢眉出蓮社醺然橫臥麴塵邊

疊前韻贈二酉室主

羨鴛鴦亦羨神仙願化情雲補恨天灼灼春花憑蝶戀娟娟秋月向人圓微茫  
古意詩三百廣漠靈椿壽八千一般淒絕都無奈畢竟禪邊勝俠邊

晚從毛家堰起岸至金仙寺

萬山如睡水無聲夜色朦朧看不清卻愛梵鐘聞遠寺一灣新月照人行



探禹王亭

曉色凝寒翠龍珠占勝形立疑波欲湧看若夢曾經海氣噴衣白墟煙濯髮青  
數椽憑絕頂傳是禹王亭

從慈濟醫院返金仙寺舟次

銜山落日薄崦嵫紅襯寒霞碧水涯三兩歸舟如箭急我心閒煞獨吟詩

別金仙寺主蓮風

初逢曾憶八年前疑是靈山夙有緣宏誓同深悲願契

會同組佛教宏誓會

高棲遙

覓海雲邊四簷澹靄籠青嶂萬頃蒼霞湧白蓮信宿臨行還繾綣何時再至禮  
金仙

臨行次玉皇韻

人生難遣別離情況是衝寒破曉行自悵幾回還自慰天涯到處有逢迎

借句

答二酉室主見懷次原韻

閉門曾擬續騷經孤憤韓非意莫寧縱是佯狂稱放達肯因澆俗汨明靈習禪

未得三心斷馳想終難一息停喜有多情老漁父頻吟新句慰飄零

懷陳純白

寒窗深坐一燈昏苦憶軒昂磊落人幽渺張皇盡勞瘁肺肝鬱勃發光芒僧曹  
醉夢頻驚喚佛理微茫藉引伸最是令人傾倒處超然諸伎獨精神

懷角虎居士

等身著作氣如虹瑰瑋文章海內工博達都無儒佛見忠貞饒有顧黃風孔顏  
樂處終身志禪淨歸途出世功半載依依交莫逆別來警效未能通

癸丑除夕

獨坐不成歡無言意自殫朱顏隨歲改華髮映燈寒指日憐孤劍觀星感定盤  
天涯久零落未得一枝安

贈李大治甲寅

幾回話舊夜遲遲往事迷離亦可悲空有霸才難造世能全傲骨願違時飲冰  
還向火邊住得志終須天下爲萬古愁腸一杯酒醉中吟苦不成詩

贈章巨摩

結交三載幾離合入世兩人咸煩憂便欲千山萬山去嗒然坐忘高峯頭

懷湛庵卽答原韻

落葉亂西風悠然小屋東迢遙千里遠皓潔一輪同逆旅悲勞雁餘生慕蟄蟲  
料知今夜裏應在苦吟中

和王舜琴感懷

四時乘寒暑榮枯各有次蕭然天地秋木葉紛萎墜楓林襯夕陽灼灼添風致  
未幾搖落盡祇餘松柏翠天平實爲之甯曰能自棄魚龍失江湖濡沫互噓吹  
卻憐沙上鷗相狎亡猜忌

答王舜琴次原韻

與君遊逍遙爲君歌大風相期翔寥廓一飛冥玄冲不二豈成異吹萬何必同  
習俗聽浮沉聊作信天翁悠悠六月息會須有遭逢世變方無已前途寧終窮

題半殘牡丹圖

富貴浮雲耳從無不散筵日來風雨急惟悴幾人憐

次鎮亭山人八十自壽原韻

淹留禹穴幾經旬竟誤彭公上壽辰佛塵未陪支許席儒宗共仰綺黃鄰文章  
豈獨傳當代天地常留不老身一院松筠三徑菊鎮亭山下許知津  
都無餘恨到心頭儘管人間春復秋祇有國家興廢感難禁民物亂離愁此心  
落落憑誰說舉世滔滔與伍羞恰好忘機遊物外喙鳴天合不驚鷗  
茫茫宦海倦遊歸悟徹蒙莊杜德機吟席追隨幾髦士釣臺古今一蓑衣山林  
有約尋禪隱薇蕨堪餐且樂饑應笑知非非亦盡更無七十九年非  
客中容易過光陰况是來鴻去雁沉未得筵前稱拜手半因病久阻歸心耆英  
社散空追慕松鶴吟成苦自禁爲祝南山壽無極也將俚句譜瑤琴

至太白山禮八指和尚冷香塔

卻憶乘槎粵海歸梅花明月記依稀

時方營壽塔成日冷香師自撰塔聯曰傳心一明月埋骨萬梅

花李梅菴書

出山杖履追隨去閱世滄桑志願違北上何堪骸骨返

民國元年冬師爲佛

教會事寂於北京 今來已是物華非青葱墓木微濛雨憑弔難禁涕淚揮

### 宿天童寺

巍巍太白峯兩浙冠名勝峨峨天童寺千古宅賢聖翠嶂界晴空寒雲生幽谷  
溪流亂清籟巖花吐奇馥嵐光蕩曦陽鐘聲破曉發百萬青琅玕掩映玲瓏石  
曾憶十年中染衣初來此以之數往還猿鶴皆伴侶一別今三載得得重相顧  
山色渾如昨自憐顏非故何況哲人萎空餘冷香塔展禮一惆悵林樾慘然白  
淨師主禪席兩歲今云餘道風播遠近氣象日開舒圓兄大心士華座繞龍象  
七處心何在二界空情想時淨心長老請圓瑛法師講楞嚴經方至七度徵心反聞何所聞我  
來剛一宿自笑非永嘉都無覺不覺明朝入塵去回首松關遠天末青芙蓉夕  
陽遙指點

### 三遊玲瓏巖謁幻人法師墓

玲瓏片石掩空蒼三度來遊感喟長古徑盤腸苔自綠幻師遺骨土猶黃潺潺  
不斷溪泉水馥馥微聞草木香鬼燄龍涎詩句好護持應得碧紗囊



北窗晚眺與佛佛王吟雪同作

遠山撐落日古渡亂流霞倦鳥歸林急高樓入望賒空懷避秦世何處訪仙槎  
小立西風裏行行清淚斜

過阿育王寺

瓔珞垂垂映寶幢嵐光雲影曉空濛千年古刹今無恙橫臥蒼蒼玉几峯

訪青幹禪丈重宿雲隱庵與良弼善亮同室

江中一帆斜飛揚江邊古渡垂綠楊樹樹蟬聲噪夕陽花木深處藏禪房舊雨  
相逢疑故鄉不談世變談家常園蔬取作羹與湯山廚飯熟胡麻香雄風便欲  
披襟當連朝煩熱今清涼恍從崎嶇遊康莊草間閃爍流螢光爛然羣星浮空  
蒼新月娟娟懸松篁林翠靄靄雲氣黃長歌掩扉踞籐床座中二友善且良笑  
語雜出渾相忘獨我睡酣魂高颺鷄鳴喔喔醒眼張半窗紅透驚曦暘太息人  
生同眇芒猶如焦鹿藏諸隍謾分清濁歌滄浪祇合振衣千仞崗

贈別許良弼

用杜子美胡馬行韻



芙蓉寶劍胡青驄丈夫得之馳西東超山越海樂其樂一笑糠粃塵世功氣壯  
理順良知致胸襟浩浩性真至交遊須得黃金揮肯讓陶計善牟利冷面熱腸  
心如鐵路見不平皆雙裂兒女情鑄英雄身胭脂色映肝膽血猛虎能搏蛟能  
騎陸沉卻喜無人知與君共約林泉老送君風雨輕就道

喜雨與余笑予同作

一天風雨過危樓滌盡炎氛洗盡愁小立忽驚衣袖薄方知時節已清秋

次韻陸愛伯感懷

終須長夜曉看日浴扶桑家國方多事心齋漫坐忘君懷鵬變志我感雁成行  
欲作神農帝尋將百草嘗

舟中遇張寄塍

兩月思君心獨苦一聲喚我耳先知扁舟共度穿山海風雨聲中聽讀詩

赴普陀舟次

年年世上勞薪積五渡蓮洋暗自傷齊到滄桑亦萍絮聽來風雨勝宮商雲兼

波浪湧晴白山接空濛極迥蒼丸彈向東南去海面痕留匹練長

懃杜多囑題其師弈濟像

我有素心友懸居東海隅相逢智慮竭渾然忘猜虞展示像一軸云是先師真  
索我題其額瞻仰儀天人生平乃未識予舌忽如結窗外風蕭蕭默坐無言說

題遯庵居士所得胸山新出唐程夫人墓誌銘

有碣有碣出胸山之土題曰唐程夫人墓誌銘摩挲幾人辨魚魯費隱道不聞  
夫婦焉用肅肅列兩廡獨行庸德偏堪嘉粲粲兒女思哀苦憑此肫肫淵淵精  
神贊天地陵谷遷移未朽腐字字還如新發硎蓬萊名鄉徵邃古遯庵居士飛  
奇思登高一呼萬竅怒琳琅滿軸光喬皇雜糅精瑩衆妙聚巖嘯潮鳴一燈慘  
淡中沉吟聊接諸君武

閉關普陀

刹那無盡卽千年應笑長生久視仙世相本空離壽天人心積妄計方圓聖堯  
盜跖名奚擇白骨紅顏色並鮮萬物一椎齊粉碎一椎今亦不須憐

此心根喜便根憂恰是低昂稱兩頭縱得四禪成不動還應三解住無求何妨  
脫粟虵同飯偶羨清濠儵共遊夢入旋螺憑宛轉沙蟲子亦亦風流  
傀儡知經幾出場等閒搓短又拖長多愛終成不定聚無求孰辨自由方了知  
淨土非天國肯信回光卽故鄉但得此心同赤子自然墾地不蟲傷  
丈夫一悔無多事活把心腸死下來爲道原須求曰損忘情那怕便身灰蕭然  
已是無長物送者都將返自崖借韻寄語世間休錯認卜梁倚有聖人才

贈別湛庵歸邗江

秋雨蕭蕭沾履及袍彼上人者來自江皋一杯滄海千里迢遙亦裹餼糧亦狎  
驚濤天涯良覲道誼孔昭欣添丰韻長髯飄搖作十日醉苦無醇醪何以興只  
新詩一瓢

秋風怒號行色搖搖彼上人者歸乘浙潮一聲珍重萬木刁凋離愁渺渺別緒  
悵悵波兼月湧浪拍山高明星疎遯碧天寂寥我心如結師形其勞何以慰只  
歌此長謠

聞聖根死用湛庵韻哀之

有此懸崖撒手才廿年前亦不須來一波起滅悲甌海兩地殷勤憶嶺梅頓覺  
知音人世滅轉難成佛我心灰而今一哭酬誰好痛淚都從肚角回

南嶽山樵自太白山來曉起有詩乃和原韻

偶從蝶化悟蟬聯消息春回枯木禪不夢周公夢梅隱冷香飛度一臞仙  
答南嶽山樵見贈次原韻

燦然黃月出松關徧界圓明絕倚攀霧翠霞蒼籠不住玲瓏高峙石斑斕  
和南嶽山樵韻贈昱山

堂堂高坐石磐陀不向山前勘老婆碎梵零鐘無壁落悠揚雲影度清波  
讀冰絃見懷詩依韻卻寄

海山風浪意潺湲一紙悲濤映恨顏可奈花空肯猶病明知念妄夢難還願持  
骨肉酬勞侶痛割頭顱捨我慳珍重故人遊絕域君有身毒之遊鷲峯吟寄白華關

慰一幻病中卽疊哀聖根韻

人生一例屠場豕步步都趨死地來枯骨塚中顏比玉黃金臺上業成灰好從  
病榻尋安樂莫便歡場忘苦哀萍絮滄桑了無住不妨彈指入輪回

送勝安返蜀

乙卯

打坐禪關亦足哀羨君猶有故山回一帆相送春風好莫待秋深萬木摧

憨杜多破關有詩徵和次其韻

鏡是軒轅劍太阿等閒心膽落天魔雙離語默國摩竭獨立蒼茫山普陀面掩  
麟傷曾墮淚尸居龍見恐興波期君促膝松根下百尺凌雲笑薦蘿  
入不厭深是竹林綠陰濃處枕瑤琴儘容百舌能多口不許一人知此心渾似  
有情紛笑罵看疑無病亦呻吟春山睡足石窗曉漠漠輕煙繞翠岑  
何必聰明何必獸獨來獨往獨徘徊龍吟莫漫驚枯木豹變寧須守死灰攜手  
真人騎日月不容餘子共歡哀百千三昧毛頭上心殿重重爲汝開

送別湛庵返楚

得得重飄滄海舟去秋曾共詠東樓一山舊雨聯新雨千里鄉遊繼客遊不可



教應憐孺子再相逢約在揚州黃鸝叫得人心碎別有奇愁勝別愁

題憨杜多作蘭幘

心頭幾點血斑爛吸自歐蠻戰骨寒本是隔洋腥臊氣化將芳豔與人看

卻非癡劍自秣陵秋來有詩次其韻

幽居原異困磚磨呼吸常通萬里波讀到賦成亡是少吟將詩好卻非多忽逢  
踏海來癡劍空憶望風倒義戈爲問石頭城下路夕陽紅得近如何  
前朝折戟認沙磨淘盡英雄此逝波落落秋心今是少沉沉春夢昨非多出天  
容我倚長劍迴日問誰揮短戈記有黃金瘞秦世秣陵佳氣竟如何

贈錢塘葆瑞醫師

零落蠻花狔鳥身君久在閩幕中空多才藝究天人荀卿非相墨非命一例何曾送得貧

緇衣重作故鄉身

癸丑出家甲寅返浙

况遇相望一水人此是白蓮洋彼岸紅塵不到好安

貧

拚將不值一錢身努力追踪空石人還被蚊虻挫精思易筋洗髓道終貧



神方一起苦吟身恐作拔山蓋世人要仗奇窮鑄剛骨囑君醫病莫醫貧  
讀齊物論

物遇長風成地籟心因深想發天機但離自取原無性怒者何須更問誰  
青濛濛外白茫茫六合中間說聖王齊到不齊成物化一場蝶夢太荒唐

壽天童寺淨心長老六十

太白仙人金之精當年曾現童子形大椿冥靈俱天死松鶴千年真彈指唯有  
義師璿師杜多行清苦永與名山名藍互萬古我憶初至太白山中天童寺裏  
受戒時桓桓寄師藹藹淨師戒壇戒堂親見來戒壇大師三年前曾寂化退藏  
密所留一塔冷香便是金剛不壞之真跡戒堂大師今當陽譬如先佛後佛坐  
道場法鼓蓬蓬來釋梵圓同大鏡無餘欠綿綿晝夜一百八佛壽剎塵又塵剎  
從來軒歷難爲籌傳道恰恰花甲周天童老人常不老不妨隨喜現壽考寄師  
壽筵我曾詩座拜翩翩而今活埋小白花不獲重瞻太白仙人獻壽之  
壽筵人如船與瓊棗大如瓜自笑住在珠寶嶺之根卻能居然窮到一具赤骨

存恨無藥王百福臂真法供養香薪燔忽然躍出筦城子松煙裊裊拂蘭汀白  
月流輝滄海鮮頌成無量壽佛篇天上之星地上之山同一名山中之僧僧中  
之師同長庚

答示一幻

一場富貴春婆夢萬種愁思古佛燈白袷緇衣總憔悴大江孤枕莽奔騰好頭  
顛竟誰來斫窮性命無天可憑何不便從陸沉去等閒歌哭在師僧

補怛禪關漫興

海島幽棲似坐船管寧傳說隱樓顛心齋恰是涵虛白門閉原非草太玄縷縷  
爐香經案靜重重燈影佛臺圓易驅惜命偷油鼠難護輕生赴火蝟半壁圖書  
連沆漉滿壺冰雪耐熬煎慣聞喜鵲牆頭叫默逗馴蛇瓦眼穿送到寺鐘催早  
起榻來吟伴擾遲眠詩思偶逐秋聲壯瘴勢曾因暑病添卻憶枉風驚拔木每  
臨清沼念栽蓮雨看千嶂烟嵐積晴放一房光氣鮮老樹窗前青未了亂山簷  
下紫堪憐朝霞燦燦生寒浦暮色蒼蒼接遠天被絮新裝任冬盡瓶梅斜插欲

春妍禪超物外空餘子鎖斷人間更幾年月影夜窺花不動潮音日說偈無邊  
文殊漫把圓通選此意難教口耳傳

題思誓室詩集

空碧澹搖秋水遠恍從天末見伊人曲高和寡吟偏苦貌逸神閒意自親離合  
死生催淚盡江山雲物入詩新榕鄉一卷關風雅子美由來是史臣

題剗蕉所藏山水圖

圖爲施聆秋女士作

太平洋中波不平蓬蓬海氣魚龍腥未能剗卻普陀好軒然天半頭崢嶸何處  
天地開鴻濛一山飛墮來相爭漠漠青霧生白壁森森叢木蔽大明欲停不停  
松間雲將暝未暝霞際城翕闢變化有神鬼巖岫頃刻換陰晴正憐孤嶼失輔  
助更見羣巒紛奔迎隱約天童乳峯突迢遞天姥腰帶縈欹岸側島因依立起  
伏多端勢縱橫一橋闊臥溪水清有客背人攜丈行不知遊客是歸客卻看茅  
屋非茅亭剗蕉捫圖忽大笑深谷還驚春雷鳴畫師先疑鄭廣文細向蒼崖認  
姓名如何雪膚花貌人胸中邱壑偏老成想見落筆風勁疾恍聞萬樹騰秋聲

始信宇宙心所作一體不分情無情

和湛庵春日出瓜洲口

傳是伍員解劍渡江處

春波鱗鱗搖圓湛扁舟如登蜀山棧聞道吳市吹簫客渡江曾此逃楚難徬徨  
一疑脫龍泉翻教漁父投深淵蘆中人兮蘆中人呼不出兮今幾年

和湛庵過漢陽歸元寺弔雲巖

剔燈曾共展奇文今日重來倍憶君一挺孤身忠佛國

辛亥義師戰敗誓守歸元寺弗遁乃與寺同燼

幾經浩

劫戰魔羣已留壯節心應慰無復知音琴可焚小繫扁舟又東渡何時重弔漢  
江雲

和湛庵五十初度二首

昔昔今今兩不遷故人非故獨君憐芒鞋箬笠三千里楚尾吳頭五十年舊雨  
尊前祝生日小晴江上養花天傾懷放抱形骸外攜手飄然總欲仙  
江樓閱盡古今人添得空王一素臣黃鶴杳然餘故址白鷗聊爾豁愁顰俠邊  
肝膽冷還熱筆底雲煙幻亦真興到應忘吾老矣及時歡賞趁芳辰

和湛庵閉關揚城東菴韻卽以奉贈

璠璵古玉淨無瑕愛我偏將燕石嘉楚北詩名傾耳早海南禪影未肩差寄書  
每署忘年字對鏡曾經較鬢華不肯一關同此築料來祇是怕多蛇

嘗說普陀多蛇

德鄰曾締記谿清幾度經商話月明聚首且留來歲約寸心難忘去秋情業多  
枉自逃山澤隱大何妨在市城千里詩筒遠相寄祝平安更報安平

詩禪處處常安樂早是雙修福慧全準備一生超十聖豈從四果滯二賢微塵  
剖出經千卷一念圓融劫萬年江海炳靈無障礙潮音應共法音宣  
混迹沙門濫吹竽形聲狼籍我誰如原知道誼同山重猶恐交情共歲除况未  
介眉黃鵠壽又難飛夢綠楊居閉關今得真消息何幸天涯展尺書

喜雪

曉來寒透夢中身頓覺窗前景物新鳥篆靜窺遺喜鵲玉書重見吐祥麟三冬  
柳絮人間瑞萬樹瑤花海上珍分咐天公重抖擻好爲詩筆振精神

歲盡



三生圓慧業一悟見天才解語憑頑石能寒耐老梅眼從雲外送頭在雪邊回  
炊得黃梁熟人間劇可哀

立春次施樊樓偶作韻

丙辰

人天默默兩忘言寂歷空山久閉門榮辱自知心已死縱橫難信舌猶存東風  
忽欲回枯木生意無私到廢園吹斷廉纖一宵雨林嵐漠漠石窗昏

病中得聊叟詠雪二絕次韻卻寄

吟殘臘雪又春時聲斷溪流凍解遲柳眼不舒梅頂禿健寒侵骨夢先知  
消盡名心與利心卻宜閒趣病中尋久曾壯士無顏色不怕床頭沒一金  
贈了意禪人

讓王千古有遺風遊俠延陵世所雄一笑桑門還斷髮人天長揖付鷄蟲

和陳師竹述懷

不復冲天慕一飛現成生事嬾研幾情場夢歷三千劫活劇知開第幾闌卻笑  
爛羊侯伯賤閑憐病鳥菽廬依漆園枉費論齊物至今何曾絕是非



贈潤州吳雲亭

桂林入都

潤州名勝甲天下，腰挾金焦兩點青。  
一江風月浪無盡，千古英雄洵更生。  
京國象呈德星聚，海嶠帆繫野人情。  
山林近日成寥落，相送惟憑墨數行。

贈昱山禪兄卽次圓關原韻

人在永嘉天目間，點紅塵亦不相關。  
三年收得牛純白，清笛一聲芳草閑。

和陶答卻非兼似定法

心性我不得物質，誰能貧道輕世所。  
貴俗棄真所勤五車競，名役千里悲行人。  
采翳日前誘逐逐，變轉新那曾容取捨空。  
自紛厭欣，遐哉定老宿危坐慈湖津。  
胸中冰炭消，忽然成比鄰。方知蓮花國，蕩蕩非帝民。

和昱山贈清虛閣

菊逸淵明宅，蓮清惠遠廬。  
香光澹花月，三昧醉何如。

贈楊一放次原韻

出天莫怪冰能熱，入地應憐世已貧。  
造化小兒何足責，還須自做自由人。

贈方瘦梅

應是毗邪會上仙未容端的辨人天蘭心已共蓮花淨慧業還同福果圓梵貝  
靜翻經十二繡幃閑習禮三千豈徒咏絮才無敵入定曾依佛座邊

答方瘦梅次原韻

秀毓靈鍾古甬東仙才謫自蕊珠宮班姬史筆光華國龐女禪機奪道公詩魄  
水含孤皎月琴心論契不真空蘭因絮果都無著一灑清言萬綠叢

贈方稼孫

汎汎吾生一葉輕聽曾培玉讀書聲藏山已覺渾忘世遇子何期尙識名海上  
梵音通警效室中晴翠絕將迎談詩不厭頻垂訪也愛才華異樣清

贈別方瘦梅方稼孫

緣證三生石交深兩卷詩相知原自早良覲悵偏遲旖旎風懷好殷勤意氣奇  
明朝聞汽笛別恨一絲絲

丁巳立春出關

出關剛值立春日，卻爲立春方。出關山後山，前霎時遍春風。浩蕩白雲閒。

題阿育王寺十二景

寺古春長在林深，徑轉迂偶然。憑玉几寫入夕陽圖。

玉几春色

欲識丹山勝，窗前草色賒。明朝晴更好，暮樹亂流霞。

赤堇晴霞

疇昔金剛杵，於今鐵礮臺。一般神護法，佛海禁宏開。

雨臺護刹

萬變滄桑裏，巋然塏一雙。斜陽分上下，雲擁影幢幢。

雙塏矗雲

曾聞迦葉佛，足跡鄮峯留。雁度長空遠，寒潭水自流。

鄮峯佛跡

一角袈裟地，依稀石上紋。烏衣新色相，日日浣風雲。

烏石袈裟

如何濠上人，能知魚游樂。還應水中魚，亦似人愛國。

魚游樂國

此井有龍臥，此日乏甘霖。誰摘領下珠，誰披沙中金。

龍臥金沙

仙才得自天仙與，人何益仙風。旋坤輿處處，留仙跡。

葛仙翁井

妙喜泉水清，趙州茶味苦。試問嘗過人，能否將舌鼓。

妙喜泉茶

不受秦封污，脩然晉韻存。放光何日事，新翠浴朝曦。

晉松餘韻

人間現優鉢天上有娑羅一例關靈瑞花奇不在多

娑羅奇花

依韻答韓蘧園

又賺名流爲品題荒唐一卷語無稽公家竟爾私三魯亂德憑誰正九黎方內  
外遊顏盡瘁世高低路走皆迷使君應有如椽筆能作溫嶠照水犀

去歲君來我閉關潘衙春訪悵桃殷

春間訪君定海縣署適值旋里

盈盈共惜天邊月落落相看海

上山已是論交神略迹未妨得句往頻還近來一事真堪笑混俗和光不得閒

與普陀嬾石過普慧庵贈下帷室主用詩佛韻

快領清談意自消恍如空外泛仙船新從古寺尋詩佛又向名山掛酒瓢海色  
蒼茫連戶牖天風浩蕩過窗寮虎溪恰好成三笑陶令由來嬾折腰

依韻答下帷室主

相逢一面亦前因况共名山寄此身稽首同龕彌勒佛詩輪大轉一微塵  
歷盡滄桑不見因與天同醉久忘身蓮洋我又成重渡何處人間可染塵

和邢蓉軒五十述懷

渾同魚躍與鳶飛，飢到加餐冷着衣。  
各道遙遊性分神，全活潑潑天機。  
仲尼此日欣知命，子美他年數古稀。  
萬六春秋大椿在，鬢華應笑未曾非。

訪下帷室主卽事用冷雪韻

淡風涼雨晝綿連，坐久談深似入禪。  
讀印觀書多興致，一杯添作醉中仙。

偕玉皇游慈谿龍山清道觀和亭間馮次牧韻

衆妙曾聞道有門，猶龍潛隱此山尊。  
一亭松竹幽吟好，微籟石泉涼意存。  
蒼翠盪胸雲不定，樓臺放眼海能吞。  
輕煙萬壑清暘裏，澹若秋宵夢後魂。

贈孔肥西和丙辰仲秋東遊雜詠六絕原韻

欲閱人間變相窮，不妨南北又西東。  
超然利鎖名繯外，便是乾坤一放翁。  
未須永叔賦秋聲，了境唯心本不生。  
白浪紅塵閒掉臂，應無兕虎陸行驚。  
晉代高風元亮宅，漢家明月子雲亭。  
幽人大抵耽禪悅，爲愛心聲靜裏聽。  
人倫自昔聖中華，喬木今還多故家。  
大雅扶輪知有在，漫將胡語譜琵琶。  
玄黃血戰起羣龍，盡入浮雲變態中。  
料得曾經滄海客，悲天憫世此心同。



端正故鄉歸去休故鄉淨土非神州神州火宅不堪住落葉哀蟬又報秋

和吟雪遊月湖詩

曾記攜吟侶秋初過月湖醫饑茶送棗祛熱扇搖蒲有句催詩鉢無愁遣酒壺  
庭前芳草綠應未委荒蕪

曉起題窗前淺草場

窗前曉愛平蕪綠石縫秋留淺草青應勝買山錢萬貫羸將清氣滿疏櫺

和陸鎮亭太史惠韻卽以奉贈

早是雙修福慧兼靈山一笑又花拈高文蓋世應無上大浸稽天不可淹佛地  
詩壇今有託安心樂道更何嫌漫云絢爛歸平淡杜老吟尤晚歲嚴

陸鎮亭太史秋日在觀音寺結木犀香詩社卽以爲題限犀香二韻分賦

二律和圓音禪兄韻

廣寒仙桂颺天香一曲霓裳落上方難得騷壇開大雅許從詩社託清狂才華  
斂作千秋鑑意氣消成六月霜應似今宵圓滿月憑人處處仰輝光

此日明州詠木犀滿身雲水又全提予方謀作扶桑遊二千里外殷回首重九糕從何處  
題破浪乘風聊擊楫登天捉月且移梯應憐海上尋詩料一角奚囊手自攜

東遊答圓瑛禪兄原韻

錫山清夢倦寒香又說男兒志四方迦葉當年破顏笑菩提何處歇心狂且攜  
詩鉢貯滄海待詠梅花傲雪霜祇恐此行難了得胸無萬卷玉琳琅

倚裝東遊和苦佛玉皇二律

曹溪一派水東行萬浪端頭跋大鯨文字業緣翻意影別離時節鬥詩情舌存  
終莫說真法禮失還須問野氓欲挈頽流歸太嶽道修途遠未能程  
此心彌滿復清淨中不容他孰可鄰漫握空拳誑兒女平添幽窞陷生民食牛  
乳虎當陽視擒兔蒼鷹古道隣莫使齒牙齊笑掉勞叨猶自話疏親

東遊和韻答王吟雪二律

東方日出紅光滿挂在珊瑚第一枝人是少年都有興詩逢佳節且爭爲從來  
未合來何別不善非資善豈師憐取眼前君意好詠梅先訂遠歸期

文心萬千手筆敏空手一雙心印傳待放輪舟到海岸再穿臘屐登山巔工談  
侃侃捕蛇者天網恢恢司馬遷海東多少興亡史不知安樂誰劉禪  
將赴日本答和章希夷四律

滌腑披臟不見魂人生真相覓無門分明容易呈千象宛轉應難賸一痕柳岸  
春深成鳥國桃源世外有山村小家珍說憑紛亂吹萬何須待定論  
玉露凝秋菊綻霜暗窗清淚向寒塘趨生物各爭天地處世人如鼓橐囊已見  
劉邦真作帝不妨韓信假稱王茫茫落葉來歌哭獨挈西風返恨鄉  
爲誰營食復忙衣佇苦停辛換昨非空養色身終老死幻成心影又依稀生惟  
義務無權利活被牽纏莫泳飛大患從知難解脫樂天還與願相違  
無端覓我亦堪憐擷得空花貫野煙疎樹斜陽紅慘淡亂雲荒草綠芊綿人天  
交接渺何處湖海飄零更幾年鼓柁中流渾未已暫時停向曉江邊

題岐昌法師照相

寒潭湛寂深千尺秋月圓明皎一輪漫說無形寧有影有情誰識本無身如何

具足孤高相偏是能同世俗塵渺渺東瀛流佛法非關海外慕真人

由上海抵門司漫吟

無盡江山匯海東一丸春日渡秋風  
漚邊映取佛花白浪隙飛來光線紅  
大死生天晝如夜小滄桑地色皆空  
華嚴剎海仙珠網早是全收入夢中  
將軍何必漢嫖姚四海波濤載一瓢  
此夜此時無限感秋風秋雨太平潮  
守梅應化千年鶴鞭石偏成萬里橋  
回首吳山青一髮月移雲駛莫停橈  
推窗又是夕陽天玉女紅膚襯綠綿  
搖出秋涼疑欲雨留來人籟喜聞絃  
無端大塊形勞我如此東流水逝年驚  
起鴛鴦眠不定粲然微笑電燈前  
應有仙蜃門玉蛟潛靈幽怪助呼號  
燃犀那得溫嶠燭折竹誰傳博野刀  
曉月晨星縈別夢墜塵零影念諸曹  
此身留待作奇死肯把千鈞等一毛

由門司至臺灣基隆

病夢迷離易斷殘  
添衣獨醒戰餘寒  
心頭突欲他生卜  
肚角翻來隔夜酸  
穩睡海棠紅隱隱  
放晴天氣白漫漫  
罡風一掃游絲盡  
不許紛紛到筆端

涼生梳末浪微聞水色天光一線分  
滬上狺狂哀散木海南羈病憶棲雲  
滄溟攬入鉢孟小荳蔻噙將肝肺熏  
造物有權終戰敗未須靈乞使氤氳  
多少揚妃出浴圖白紗幃外影模糊  
也關佛說衆生相算是人間女丈夫  
拍合胡笳誰蔡琰風觀夷女幾羅敷  
偷閒籠得雲鬟就又換鮮花把粉塗  
一卷金光至教存和風有扇劑寒溫  
扇懸已是難成睡枕倚還應暗斷魂  
浪碎萍沉驚短夢探消問息悵無門  
善天女咒空持誦至竟何曾見道源

### 登月眉山

不二門開道有師

由基隆至靈泉寺約六里行三里至月眉山麓有門額曰不二法門

進行無復費疑思  
紆青路比長安直

環翠亭留小住宜隔樹幽溪消世慮  
聞鐘梵刹見僧儀  
此身又在深山裏  
初夜當看月似眉

### 日本發臺灣寓靈泉寺卽事

上極天蒼蒼下窮水茫茫  
中間何所有一鳥東南翔  
厚積六月息軒然翼怒張  
白兔伴之行赤烏浴以光  
左盼失鄧林右眄辭扶桑  
去去瀛臺洲縹緲蓬萊鄉



仙鄉忽已達羣動朝皇皇五尺一奇士身短心獨長昂首招鸞鶴鸞鶴休高揚  
低頭呼魚龍魚龍休潛藏於法得自在云我爲法王造化司橐籥宇宙歸括囊  
搖蕩而恣睢孟浪以猖狂與爲無町畦且令蹈大方前不見羲農後不見漢唐  
孔墨脫桎梏堯禹落糝糠何謂歐羅巴一粟飄太倉何謂美利堅衆蟲攢敗襠  
何謂拿破崙小醜偶跳梁何謂華威頓稚兒喜得糖耶蘇摩哈末瑣瑣歆天堂  
盧梭達爾文偃偃墜鬼坑利亞能食壤丸丸轉結蟻威廉能磨刀霍霍向猪羊  
古今一邱貉罡風輕塵颺旣與外天下亦使生死亡醍醐灌大頂甘露潤直腸  
彼彼無熱腦人人獲清涼事事普成毀物物咸迎將洗腳登道岸霧深夜未央  
漫漫不可辨轉陷荆棘場水仙幸知警懷內披短章援之榛莽墟尊之瓊瑤房  
相見如相識歡生禪客粧相識還相待升降尋趨蹌飛鯢奔雲氣俄停古渡傍  
拍拍又浮去疑欲藏諸隍魚貫入官舍遲遲幾徬徨簿書堆滿屋憐伊無事忙  
三聖重接引舉步成康莊分明媽祖宮不是德壽堂鳴祀化城耳行行趣寶坊  
沿途多煙燉回首杳帆檣高躋不二門盤紆過崇岡疎林度梵鐘幽卉含妙香

庭殿闐闐開金碧何輝煌湛湛靈鷲泉勝地最吉祥彎彎蛾眉月佛子示覆障  
佼佼善慧師股肱多賢良食我以玉粒飲我以瓊漿游我芳菲苑衣我雲錦裳  
坐我芙蓉座浴我荳蔻湯居我散花室臥我離垢床晨興縱游眺指點爲參詳  
此山伏金精佛面金色黃此山含寶氣峯髻寶塔裝出山一猛獅舞若青鳳凰  
入山一香象宛如綠鴛鴦塔心啓玲瓏寺形合圭璋制作關天人才巧雙難量  
自我入山寺淫淫雨不暘隱隱三仙宅攀探徒悵望悠悠五佛臺夢魂空徜徉  
題糕記何處忽忽今重陽當時凌波濤不異處巖廊連日沉嵐霾還疑遺滄浪  
安得御六氣浮雲掃入荒仰摩山巍巍俯瞰海蒼蒼

靈泉寺塔

名山營佛塔勝地建禪林不獨才思巧尤關德意深制參新世法道契古人心  
何處聞鐘梵靈泉演法音

答靈泉山諸德

定知詩律杜陵師佳句抽來絕妙思古貌古心雙不借名山名士兩相宜瀛臺

自昔神仙宅蓬闕應存漢晉儀笑我秋瓠浮五石漫遊何幸識芝眉

靈泉寒翠居

寺是靈泉境未是靈泉心欲識靈泉心更入深山深內有大水窟潺潺常龍吟  
撥雲窮杳冥曉露濕衣襟行盡得禪室悠然寒翠岑

靈泉法會

五臺俱會出尋常七日宏開選佛場八面玲瓏三寶塔十方洞達普光堂洗心  
藏密穫秋實止雨停風乞太陽千尺靈泉兩眉月待裁霞錦入篇章

答日僧慈愍

斜風細雨暮秋天此地相逢亦夙緣記取靈泉三塔影與君佳話共千年

辭月眉山

此行歸去有餘師半月優遊足我思塔隱九層分合巧韻成三疊唱和宜陰晴  
不測天經濟道俗交參佛律儀曾憶似眉初夜月更堪後夜月如眉

寓基隆贈許顏二君

人生遇合亦何常  
翰墨緣深興便長  
料得他時歸國後  
還應有夢到東方

和梁任公壁間韻

一樓帆影度仙舲  
清淺蓬瀛過幾程  
殘雨曉風吹欲斷  
晨星落落數燈明

詠水族館

不辭徒步雨淋漓  
眼界添來水族奇  
種種衆生種種相  
分明容易又迷離

赴臺北

回憶基隆初到日  
捨舟半月乍登車  
撥開雲雨到臺北  
天末飛虹橫暮霞

遊臺北街

晚來偕向市場遊  
燈火星羅車水流  
一切繁華如電拂  
生心無住不停留

新北溫泉

靈霖吹來欲濕衣  
電車形式汽車機  
特投新北試新浴  
塵事靈泉兩不依

遊臺北公園等處

偶從雲外昂頭立  
領下羣巒翠帶圍  
料得月眉山上雨  
地天分處彩虹飛

遙望月眉如女兒雲鬟霧鬢未開眉一衣帶水雙橋路動物園中夕照遲  
紀日本太虛

日本中華兩太虛未逢先見壁間書他時如有相逢日面目鬚眉如不如

善德堂

捲賸秋風黃菊影開來午日綠柑村善心男子慈心女用壁間聯語一例如來德相存

送別岐師

憶自明州發脚行俄將一月寄蓬瀛游懷寬處歸心急屈指猶須十日程  
古人八十猶行脚六十於今亦趙州漫道古今相去遠一杯滄海幾曾浮  
無心雁影度寒潭作客非關客味孰已是天涯同作客客中分別更何堪  
芙蓉乍放菊初殘眉月又將初夜看再待風霜經一月臘梅歸詠雪香寒

彰化曇華堂卽席答施寄庵

未值嵩山面壁僧幸聞遺教道堪徵願將文字有爲法傳作光明無盡燈北拱  
羣星爭燦爛東流萬派與清澄詩壇今夕參三昧佛也拈花數未曾



和勢山廳長

一現曇華直指心欣從海外拓胸襟達摩千載無消息今日彰城見少林

答黃臥松居士

戰國世重開日局殺人場欲闢星球羣魔忍看爭千劫一鏡誰懸仰萬流有漏  
雜心因莫造衆生同業果須酬漫漫長夜沉沉夢一念圓明便不儔

和蘇南記者

猶未觀光向二京更須買棹渡東瀛最宜萬頃汪洋水擾不濁兮澄不清

和王敏川

秋風獵獵暮雲低各有來時路不迷了得佛儒無二致不須原道笑昌黎

贈芬蘭女士

得到娜嬛福地遊應曾慧業幾生修豈徒書勝十年讀渾不劍行千里留何處  
帝天成電笑無多佛法付風謳火中優鉢誰能似秋後霜英紅未休

答林湘沅

最愛離騷讀遠游湘波渺渺憶前修雞林價格曾懸解鴻雪因緣喜迹留今後  
應教常紀念此間何幸共清謳高風千古林和靖寧止能詩皮日休

贈周永福

佛心通處卽靈山福慧深修不等閑應與眉峯千古月共流光耀滿人間  
我今親入衆香國應勝毘耶會上逢直至菩提乃消得天花無著且從容

臺中講演會

根本法輪惟一音隨機得解在人心千流萬派無辭讓始悟歸墟佛海深  
神話洗除存德音逢人直指佛唯心拈花一笑靈山後重會臺中悟入深

臺中展覽會

聽徹絃歌雅頌音十年教訓百年心示人多少良模範應比空言感化深

和黃子清

同根天地卽真吾心外由來一物無畢竟無人無我相不妨相見兩糢糊  
如讀南華秋水篇令人神往意相牽定知參透莊生旨一物能齊大小年

和峻山

掃除地棘與天荆盡使人心向佛傾  
端賴君曹入塵俗共將濁世一澄清  
曾從佛法得心休念念能通覺海流  
彼岸誕登回首望仲尼猶是一天囚

謝子林

潦草未成章偏難拙自藏  
磚拋能引玉吟穩靜聞香  
卻憶青山住曾憐白日忙  
人間小遊戲容得我清狂

赴阿罩霧林宅

一回合眼觀阿彌已過蔗田十里奇  
巖岫遠從雲霧看新高山色舊迷離  
悠然當戶有青山花木陰濃鳥語閒  
領略此中高雅趣能令世慮一時刪

贈林階堂

五桂堂連花萼樓名園喬木德馨留  
秦王漢武空存想輸我蓬萊仙島遊

贈林獻堂

淨名居士是前身會得無言道最真  
卻引文殊來說法一時傾讚動天人

寄洪月樵

珠碎南崖槎浮東海變入滄桑注破冬青之引迸來哀憤幻成春豔之歌聞  
夏聲而如在知漢澤之猶存爰和鶴唳用達鶯鳴

曾聞天網說恢恢讚佛梅村拜五臺蓬島連雲秦代望潛疏有水漢時來聊從  
大海遊懷放怕向中原醒目開鷄鶩一羣祇逐食治平無復見雄才  
年年不共不能和早是光陰六載過據社憑城狐鼠逞噬人肥己虎狼多浴雲  
嫌我帶龍氣講學逢君隱鹿河便好蒿萊同沒盡不關臨去轉秋波

臺中公園散步

垂柳條條舞碧波水心亭子曉風多此間別具天然趣下有魚游上鳥歌  
鳥語清圓入耳宜晶瑩樹色露華滋波光畫出垂垂柳恰值無風不動時

別臺中寺日僧大野

百城煙水卅年身來作支公座上賓目擊道存溫伯雪不須言說自情真

答別臺中諸友

出岫閒雲偶爾來會逢展覽此中開得君一角袈裟地盡化台灣作講臺

由基隆發神戶

別離容易又銷魂不異秋風出國門碧海粼粼搖夢影青山隱隱認詩痕欣從  
名士稱禪客愛此蔗鄉接橘村兩月優游一彈指萍踪絮迹本難論

赴日樓船散步

怒濤飛舞萬銀蛇盡向蛟宮認故家人在下風低處立還須亂墜是天花  
蓬萊三島海天鄰零落天才覓漢秦尙有桃源餘韻在風流絕似晉時人  
一水澄鮮綠似苔樓船高處步瀛台斜陽兩見天無際忽見青螺九點來  
睡去茫茫水接天醒來忽在萬山邊一來一去成重渡風景依稀未隔年

宿小郡溫泉旅館

也似南京有下關曉車飛渡萬重山來從小郡湯田浴細雨微風暮色殷  
平生最愛是山居淺靄輕嵐此寄廬小小園林饒逸趣池邊水鳥水中魚  
圍爐煑茗夜談清身意安恬夢亦輕夜半鈞天聞廣樂隔樓徐度繞梁聲



雲開山迥曉樓晴檻外清天檻內明大有五絃揮手意憑欄目送一鴻冥  
訪曹洞宗第四中學林

晴峯頂上青天迥白日光中素鳥翔簷下寒巖佛無語雲邊古寺塔成行桃花  
碎作千林錦楓葉飄來一路香仔細參詳新學制不妨歸去欲斜陽

赴廣島車中

波光島影天連水沙白松青石接雲海景山嵐無限好收羅且趁未斜曛

宿廣島龜福館

一時風雨一時晴渺渺煙波兩岸平海市蜃樓多變幻潛靈幽怪怕分明巍峨  
佛塔依神社激灑山光映水精斷嶼連嶠有仙意雲開霧合逞才情  
崔灑未題黃鶴樓雪泥鴻爪讓先留蓬壺此是新三島世界今傳大五洲過客  
知誰龜又福閒人似我鳥中鷗江山漠漠迷煙雨始信乾坤日夜浮

宿岡山後樂園

勝是明州後樂園會聞七駐葆華軒衝寒得得冰霜踏擁翠團團草木溫玉鏡

一池光影瀉緗煙千嶂畫圖翻林間立石橋邊鶴也似遊人愛曉暎

贈莊櫻癡

陶朱自昔住蓬萊隱見人間第幾回宅泛五湖應已徧業營三島更閱開嶽奇  
磊落關天性文采風流華國才聞道摩耶山上路深心不獨是疎財

贈別莊櫻癡

一窗紅旭吐東隅明月曾窺貯玉壺多謝淨名分丈室還應說法愧文殊

贈謝籟軒

解得三隅反一隅不妨圓嶠卽方壺神仙海上相逢處世外人間兩未殊

答鴻汀次前韻

原來不用反三隅等是空空付一壺但得世情同覺悟禪逃商隱未途殊

遊神戶公園等處

蕭森松柏石峻嶒翠冷蒼寒此共登祥福寺成初到地玲瓏塔現最高層大倉  
山達天門近小趣園幽鬼谷憑遊罷金星臺上望神皋莽莽暮煙騰

京都遊

身似太空飄一葉歲暮來游微欲雪京塵不揚翠霧霏蓬萊宮殿境清絕西歸  
本願見未真無量光邊同磬折三十三間千準提十六明王半明滅古物縱橫  
看不窮佛華刀影眼中挈涼羽清商流水音登高遠望淨無纈獅攫象擲狐裝  
人擊鉢鳴杯入織屑夜從書城搜蠹殘花海燈市纔一瞥披得如來功德衣案  
外點燈案內說更聞明日訂同遊不知何處磨輪鐵

續京都遊并夜觀電影連鎖

三轉四折不知處行來忽在法隆寺當年佛法初傳至聖德太子始建樹聞已  
千有二百歲驅車僕僕嵐山行猗猗竹外田疇平照眼一溪流水清松青楓丹  
相映明潺湲猶作太古聲不是天龍一指禪墨龍夭矯蟠雲天畫龍石硯猶留  
傳我讀天童寺誌時曾知日本榮西師法傳妙心東海歸遙遙臨濟宗派開更  
聞大學今多才誠心專來瞻光儀日暮途遠悵望回我離台五來五臺弘濟大  
師山寺開寺是清涼宗天台東西本願何紛紜本派大谷派又分學舍嵯峨高

連雲創設六十餘年間學生五百五二云云聞道智山勸學院當年諸宗學共勸  
專宗設學制度變今已分途各樹建智積院從空海現所宗是密不是顯五十  
假音施方便迄今真言風未墜傳教之外此爲最知恩一院最閑寫念佛稱名  
宗善導淨土本以方便妙圓光大師領其要尼衆設學此堪効京都最是圓山  
好歲暮天寒青未了依山因水園林繞形勢天然少人巧步步入聖出意表燈  
光如海浪花湧幻幻真真一劇統原田之兒知何種

題壁間畫

近山如黛遠山青一舸容與一舸停橋畔郵亭巖下樹泠泠客夢幾曾經

贈萬非道人二絕

光陰原未失東隅珍重冰心貯玉壺君是道人吾佛子山林城市竟何殊  
中原走失連城壁化爲海上草廬石奇石一旦遇知音也與拱壁同珍惜

贈別神戶善慧諸友

迥然空劫出今時不可團圞不可離聽取無絃琴一曲高山流水證牙期

何須更著定交篇道誼心兼翰墨緣見物思人多紀念月眉神戶兩難諉

泊門司

更無錐地駐離魂又是孤舟出國門野鳥輕帆遊客感連峯斷島暮雲痕海燈  
搖出西風意漁火遠明微雪村飯飽只求能睡穩茫茫世變敢評論

泊長崎

雲影波光盪客魂嶮崎長島鎖倭門廟留唐將征東跡師乞明臣伐北痕一樓  
海宴存中國八首詩遺讀晚村風濤此去知何狀夜夢沉沉不可論

長崎觀鷗

衆生業力不相同羨爾能行水陸空浪雪濤花天上下白棉飛破曉煙紅

歸滬和陳完贈詩

出門曾未漫言歸何處虛空去又來直到維摩深杜口方聞舌底有風雷

答穆穆齋贈別

三年成一面頃刻又天涯此意原難說爲君強作詩蓬瀛證仙佛津島駕蛟螭



客路憐交臂，催人是別離。

歸甬送別劉驥達道尹

西風吹離夢，冰涕斷縱橫。逢我櫻嶠返，聞君瓜代成。定知眠益穩，不厭食惟精。暖入春池水，應看縵更生。

答陸和仲見贈原韻

秋水爲神玉立身，自宜蕭灑出凡塵。聯吟已過初陽節，修禊當期上巳辰。雪裏梅花論絮果，山中芳草證蘭因。寒香徹骨饒清興，袖得新詩過我頻。

漫和陳八千見贈原韻

聞道靈椿享大年，春秋萬六傲神仙。逍遙人海劍千里，安樂生涯詩百篇。情未發中何氣象，事曾經後總因緣。莫將混沌問盤古，闢地開天已可憐。

和王志澂知事去鄞留別十二首之二

偶作時裝本是喬，醒眸常豁夢難招。逍遙獨喻人間世，綽約多姿宦海潮。峴碣他年頻墮淚，龍泉何處一鳴腰。南岐島上休憑眺，無限欲歸歸未撓。

竟從末劫現奇特優鉢羅花開火中聞霹靂聲來夏雨得清涼味賦秋風龍華會上皆成佛雁宕山前倘見公最羨安排歸計早脩然物外未匆匆

次韻贈昱山

萬六靈椿夜吐芬間田地上獨耕耘木鷄啼出遙天月蕉鹿眠深空劫雲白浪紅塵全大用烏紗墨汁露真文歸家漫道無長物四海昇平總屬君

濤音禪院題壁用古德如訥禪師韻

戊午

山光鏡萬流端合此清修梵唱濤聲雜蒲團海色浮鯨波高過屋蜃氣幻成樓獨坐危巖上胸羅大九州

次嚴友潮游普陀原韻

脩然解組蓬瀛游五石詩瓢雲端浮消搖物外飛仙舟振塵落葉輕王侯清風徐來涼颼颼忽在短姑斷岸頭天空海闊開吟眸無限斜陽翻雪漚蜃氣幻成金碧樓佛國彈指呈山陬渾欲敝屣棄五洲濯足滄浪萬里流林中野衲麋鹿儔深日高準如胡愁祇言隨分何須求伸脚能眠便可休詰朝相見披輕裘同

拂蒼煙問壑邱白華紫竹靈石留潮音梵音奇且幽大雄頂上論真修究徹人  
心靡所繇燈窗夜雨思悠悠

贈趙伯俞蕭梧喈馮元溥

呼地籲天聲忽高潮音遙接梵音號一奉奇石浴林籟千步平沙翻雪濤應是  
山靈傳影響重將佛法囑賢豪使君一語安危繫大事因緣不易遭

和張伯壤西湖偶作

微涼散暑早秋天數片閒雲白蓋懸安得湖邊容一榻倦來高枕北峯眠

輓蘇元瑛曼殊

昔年精舍建祇園我亦宜南學弄丸十載未能謀半面一書曾憶剖雙肝天荒  
集裏同留句世亂聲中忽蓋棺不信奇人竟庸死欲歌薤露意先寒

送冰絃

別來往往思終日相見疑非相識人也有哀情傷老大尙能苦語吐天真習勞  
轉喜成窮子渾俗深慚作幸民好與懸崖雙撒手不須後果證前因

贈元白居士

一例華夷大相斫側身天地怕逢人  
偶從海上成知識便許環中共道真  
覺世讓君先覺士平心還我太平民  
好期攜手登靈石悟未生前佛性因

陳自聞居士自漢皋同舟至滬用李隱塵居士韻賦贈

一默聞無際超然出古今  
有緣成好夢無法說真心  
風雨孤舟共江山秋意深  
何時蓮社結新句謫仙吟

舟次九江雨中望廬山不見懷東林蓮社用李隱塵居士韻

白霧迷天地匡廬面目真  
境非關質影緣莫辨疏親  
遙結東林想輕揚北海塵  
墜空花雨滿揮塵更何人

弔樂清白鶴寺華山禪師

在昔有大寂曾夢河梁  
傾何我兆未預而師超  
已橫聖湖永成憶慈水  
早知名

初相識於慈溪西方寺彈指已十年矣

善逝得至樂難爲存者情

天童掃入指頭陀冷香塔

三冬愛日有餘溫師破已六冬矣巒翠微微熨曉曛青鳳山高隱靈塔師有青鳳山前聊葬骨句白梅香  
冷讀遺文耳根寒漱一溪玉心海深藏萬壑雲歲暮林空風亦靜更無黃葉落  
紛紛

張公季直邀南通紫琅觀音院講經己未

層樓挹高霽林杪曉煙青巖潤饒禪趣谿幽媚德馨琴彈無盡意鐘擊普門經  
後夜窺寒月秋聲曲徑聽

送寶華奩主返川

偶語寥寥意便深能融三藏入新吟好從古德傳燈錄窺見空王授鉢心太上  
情忘了身患達多狂歇不頭尋錦旋喜聽佳消息雲豔青山月滿林

和僧度陪羅峙雲居士游湖山庚申

峯迴摩詰影湖映爍迦心春色了無住風光祇卽今亂紅看似織肥綠欲成陰  
策杖探幽闕入山深復深

香港卽事



落落青天碧海心十年香島夢痕尋  
濤花飛濺靈山石星火疏明祇樹林  
僧俗混融懷濟世魚龍圍繞聽談經  
維摩丈室今分得不二門應入更深

### 洪山卽景

小駐龍華寺

路過龍華寺  
駐一時往洪山

驅車向寶通深深重見塔寂寂一聞鐘  
石磴苔猶綠霜

林楓正紅登高成遠望江漢欲浮空

### 赴長沙車中和李隱塵居士韻

嶽雲湘水明如畫應嘆心工造化奇  
愛日顏開老柳葉睡山身露大牟尼  
一源上溯來無際兩岸中流渡有師  
徧地瘡痍未收拾幾人同體發慈悲

### 遊嶽麓山

曉拂湘江渡微聞款乃音逆流能入性  
向上不傳心深靜觀山色丹青繪樹陰  
蔡黃憑弔處城郭渺煙岑

時勢造雄鬼干戈泣賸氓初欣息塵擾  
便作入山行尙有林泉趣微存佛火明  
虎岑堂寂寂來覓大蟲聲

淨慈寺運木井造濟祖殿落成

辛酉

問師何事下天台借醉裝顛度世來運木南屏留古井百年榛莽此重開

都中卽事

神京一演維摩詰彈指流光兩度秋今日法華重啓會大家高上佛乘樓

啓講

輕雲隱隱月娟娟三度中秋各一天明闇色空融妙觀松霄鶴漢照同圓

中秋

大地山河泯一色山河大地露全心塵中剖出新經卷鼻孔撩天孰辨音

轍講

偶因佳節一登丘吟到重陽欲送秋飽飯加衣齊努力應看進步到竿頭

重陽

阿彌陀佛誕曉前月光中聞念佛聲喜作

佛聲圓潤月光寒閉目聽還展眼看直使夢醒成一覺不從空假具三觀方知

佛本心頭在只要人休自己瞞十萬億程消息近曉鐘清梵報平安

和韻題青山紅樹一僧歸圖

吾生泊爾猶塵網子意脩然出世間息影曾尋孤島遠鼓輪重向大江還救人  
從井今應倦得免亡筭古可攀他日青山紅樹外爛柯煨芋儻能閑

次元韻送別趙壽人返皖

壬戌

歸元一會集諸方緇素同登說法堂藉指應看天上月聞聲偏顯性中常莫將  
累劫浮塵客埋却當今大覺王一吸皖江無盡水還從識海觀含藏

壬戌三月黃陂謝鑄陳縣長及趙南山陳叔澄柳質皆邑紳等邀赴該城  
說法同行有釋了塵暨陳元白李時諳孫文樓王幼農陳仲喈杜公材  
等叔澄和前年赴湘一詩見示因次韻書留紀念

未可栖栖笑仲尼頻年我亦慣驅馳春深大埜來今雨學講前川憶古師佛海  
潮聲傳隱約人天夢影正離奇法身流轉愴無極應有維摩病大悲

爲盧鴻滄居士題僧相

從無相處能呈相悟徹空時不取空雲水一身天上下風濤萬里海西東蒼茫  
世變逢今日矍鑠人豪有此翁利鎖名韁羈不住到頭歸向佛門中

浴南京湯泉

欣逢勝境且隨緣眼底風光已了然尙待解衣同一洗水因親證性中天

屹立蒼茫世變中，龍蟠虎踞氣猶雄。十年塵影付春夢，四廓煙嵐盪暮鐘。夜榻  
靜聽荷葉雨，曉車涼納稻花風。靈泉湛湛溫全體，一浴歸來萬慮空。  
一鞭歸路指朝陽，姊妹崗連老虎崗。轆轤蹄輪渾不住，亂雲微雨總清涼。  
自大觀亭赴地藏菴

何處登臨寄客情，望華樓畔大觀亭。窗前綠水懸紗幃，檻外青山列畫屏。偶聚  
應憐類萍梗，幽尋暫喜適林坵。蒼茫暮色垂楊裏，共向禪關一叩肩。  
迎江寺振風塔

前二二又後二二一塔岩然入蔚藍，雲樹風帆明遠近。電燈高照大江南，  
菱湖公園

菱鏡月移荷葉影，湖樓風送藕花香。歸車緩緩饒清興，堤上涼蟬鳴綠楊。  
大士閣月夜

近枕江流遠倚山，輕風拂拂過窗間。一樓明月涼如水，小坐能教萬慮刪。  
竺菴長老偕宿九江曉登廬山牯嶺

我到剛逢兵劫後可憐焦土不堪遊蕭寥夜半江頭月淒照潯陽古渡秋  
旅夢曉驚涼月墮山遊風御早車行九江回首囂塵遠一路蟬聲撲耳清  
成道日逢觀世音古籐扶我入山深知身已在煙嵐裏流水微聞一證心  
蒼茫綠海渺無垠峯浪雄奇雲石皴今日廬山忘面目我今親見此山真  
天然此境獨靈虛深谷高巖兩不居電綫盤空雲路曲數峯嵐翠漱吟裾  
白雲如絮沸山頭一嶺青眠水牯牛青白兩亡牛露地大觀樓上暢神遊

牯嶺雜感

雲頂一峯曇詵迹大林三寺白香詩夕陽何處遺蹤覓煙綠塵紅總可悲

御碑亭

御碑亭上古仙尋指點雲山望二林煙海渺然成翡翠遙遙塔影暮雲深

天池寺

羣山左抱一天池猶是魚龍在潛時命世曾來朱太祖曼殊臺畔好栖遲

曉赴黃龍寺



林蟬調出管絃聲  
溪流成鐘鼓  
鳴曉赴黃龍  
山徑僻松間  
滴翠喜初晴  
赴棲賢

龍溪湛鏡石  
砢砢下嶺輿  
如赴壑  
蛇手挽七賢  
招五老  
空留形勝野  
僧家  
鹿洞書院

歐風美雨蝕靈根  
物欲紛馳道不尊  
白鹿何時重會講  
好從儒學溯禪源  
周村避雨

蠶叢鳥道疑無路  
轉入松林一徑幽  
蟬噪夕陽雷雨急  
周家村裏小勾留  
訪德安長老宿白石寺

窮幽訪勝快今宵  
空谷來音破寂寥  
風引修篁拂樓角  
雲含明月吐山腰  
傾瀦倒峽松濤壯  
初夏深秋溽暑消  
人海浮沈多倦客  
東林舊業隱堪招  
五老峯前氣象雄  
深藏古寺竹林中  
凭欄湖眺鄱陽遠  
穿石泉從滴水通  
宛若芙蓉青嶂列  
悠然鐘磬白雲叢  
匡廬佛化欣重振  
白社於今有遠公  
自白石赴歸宗小憩萬杉寺

未曾遊海會且轉向歸宗山  
瀝池水綠岡吐嶺泥紅鳥語林間媚  
龍珠領下空  
萬杉青掩映古寺一聞鐘

秀峯寺

古開先寺

飛瀑掛蒼崖龍潭氣象恢灑松泉滴翠濺玉壑鳴雷山雨飄飄集溪風拂拂來  
五峯羅秀色古寺此先開

歸宗寺

直入歸宗室超然忘主賓乃今牧牛者可有斬蛇人  
沼鏡荷香永田衣稻熟新  
漢陽峯下寺獨露大雄身  
鐵塔耶舍尊墨池王右軍嘉陵遺跡在紫柏中興聞曲澗流餘韻空林慨夕曛  
金輪一重轉雲氣觀細氤

自歸宗赴西林東林宿東林寺

不盡溪灣曲無數山疊重幾回橫側看成嶺又成峯  
我到匡廬遊平生遠公慕人事多變更山寺幾新故

寂歷西林寺瞻仰來日暮蒼然塔一枝獨劃虛空破  
東林亦寥落蒼煙滲雲樹禮祖懷瓣香飛空阻靈雨  
拂曉出山寺步行遇虎溪未能成一笑芳草正萋萋

太平宮阻雨

斷塔兩枝古蒼松一徑深雨聲留久坐得句且沉吟

返九江途次

漠漠飛蒼雨蓬蓬駛素雲瀑布空中落銀龍舞碧雲  
雨過溪流闊秋聲萬壑騰輦歸天未晚買棹恰相應

和空也登抱冰堂原韻

木樨香裏露堂堂良馬獨驚鞭影揚事火應憐添熱惱抱冰未必得清涼但開  
般若頂門眼自獲摩尼心寶藏落葉瀟瀟秋色滿一林功德性天香

爲智信舉火書感

衡嶽全身露師出家南嶽漢江一口吞今破武昌質灰靈不滅骨碎願猶存太白前塵影予初識師

軒岫南屏昨夢痕

師助予主淨慈最力

法門秋色晚獨坐悵黃昏

### 悼大慈

海南聽法獨超然儻亦靈山有夙緣宏誓願中求組解急流津外著鞭先閉關  
未滿三年約到死猶持一念堅畢竟大悲心咒力翻身不戀樂邦蓮

### 聞雷

雷聲一演馱羅尼萬法唯心悟始奇衣裏神珠何得失夢中情境自歡悲能空  
聖礙皆爲佛各有光明盡可師兩岸中流舟一葉飄然無住亦無馳

### 伯尼

今聖曾聞說伯尼仲尼而後有斯奇標新領異如風起逐物移情尙火馳萬事  
精通徒逞智一生空過却堪悲重重見網紛無盡檢點將來孰可師

### 壬戌歲底陳元白等偕赴宜昌雜詩

小別漢皋逢歲尾乍經沙市恰年頭中流一舸渾無住更向長江溯上游  
衝寒約伴上東山小塚纍纍古寺環高閣推窗一憑眺江城已在翠微間

草堂閒坐對寒林，杯茗傾談括古今。多少廢興成敗事，茫茫遺跡不堪尋。  
峯迴水轉古彝陵，三峽門開第一層。春水未生山影瘦，清流淺淺石峻峻。  
前三遊後後三遊，今日三三併一遊。坐斷古今前後際，蘇黃元白此同遊。

癸亥元宵前二日偕陳元白蕭止因陳妄清杜漢三王詠香陳子端遊萬  
家河維摩精舍智悲閣訪全敬存

谿風颯颯寒生袂，崖石磷磷看出神。軟語杖頭憐好鳥，卜居谷口得幽人。再來  
摩詰賓中主，一現優曇物外身。共上智悲高閣望，山花無限正胎春。

維摩精舍

大橫峯勢鬱長城，萬翠攢流那惹坪。嶺表分鄉關，守望塵中混俗尙。和平山川  
曲達窺經絡，草木扶疏見性情。一塔峇嶢在天末，小溪清淺月初生。

荊州承天寺

一徑淒迷瓦礫場，劫灰堆裏闢人荒。忍看殘碣承天寺，猶記前朝裂土王。漫向  
廢興來感慨，盡將哀樂付微茫。欲回宇宙清寧紀，好擁天龍護覺皇。



癸亥端午登洪山

午日驅車向曉暎大洪山色混天痕間來物外觀雲變小憩林間坐石根黃鶴  
聲清迎客至白龍泉冽喚僮溫結茆欲在孤峯頂煙水重重一望吞

再上廬山

一曲廬山太古琴幾回彈作海潮音龍懸瀑布翻危石魚貫籐輿赴大林不盡  
谿濤騰逸興無邊風雨助清吟忽然捲入雲堆白挂角羚羊沒處尋

大唐國裏只無師不是無禪

黃蘗語

悟者誰觸目了然皆佛土子身偶爾過天池

條條瀑脚垂千曲點點峯頭數九奇俯仰文殊臺上望神龍惟許白雲知

佛手崖間翡翠屏周顛迹渺御碑亭橋當錦谷殷回顧樹古雲峯且小停澗底  
壓來千嶂黑塔尖浮去半山青衆香飯熟西林寺數杵鐘聲破寂寞  
香爐峯畔講經臺宛若蒼厓虎擲回跡覓化城空結想劫餘崇福竟無灰牯牛  
綽約仙成市盤石玲瓏鬼積堆回首東西林已渺仰看雲頂獨崔嵬

和隱塵居士見贈原韻

突露虛空一講臺萬峯青擁佛頭苔千年暗室燈前破四色高蓮雨後開鑄聖  
鎔凡此爐火括囊躍冶亦人才鬱然花木成林地圍繞天龍震法雷  
廬阜一名敷淺原溪聲山色自年年獨憐荒草七層塔不見清池十丈蓮法鼓  
乍驚三界夢蒲團猶帶九州煙幾人白社賦招隱佛日重光照大千

赴黃梅宿小池口

自從衣鉢此南渡江月江風愁絕人一宿小池驚夜盡滿天風露浴星晨

老祖山

未朝四五祖先禮老祖來曉行適空曠境舒神與恢我聞老祖者得心達摩梁  
千歲名寶掌息化南宋杭不知何朝代來此剎竿建獨處雙峯雄倚天卓長劍  
佛魔一齊斬聖凡兩不立東南西北山俯同兒孫列寂寂千百年不聞獅子吼  
我來一振聲林藪驚飛走聊汲古梅泉小坐大悲閣塵囂阻重嶺清淨真佛國  
擲筆無所言飯熟且一飽下山趁夕陽朵朵青蓮好

癸亥七月七日宿于黃梅五祖寺

薄暮下老祖涼生松竹叢看完誌一卷行盡岡七重月出日欲沉炊煙滿林薄  
嶺嵐溪韻中直上東山宿五祖有肉身歷劫不磨滅展禮期明晨心香敬先蒸  
廿年慕忍師萬古大奇傑傳法行者盧此事真怪特達摩一線光佛佛髓中液  
卒藉賣柴漢盡情爲漏洩一花五葉開弈世芬芳續日本高勾麗風播恆沙國  
獨惜禪海源法流漸枯竭願我山中侶發奮究真極一脚忽踏翻全身活潑潑  
鳳凰撲天飛獅子踞地立一切災厄除一切吉祥集是謂心地平天下太平畢

東禪寺觀六祖墜腰石

漫云頓悟南能易曾出身身血汗來辛苦墜腰一片石東禪劫後未成灰

黃梅吟

五月上大林七月下廬阜黃梅招我遊日暮渡江口一宿小池柵再宿孔壟校  
此地禪之宗斯民佛所教云何忘本真恣然縱三毒業感蛟爲災洪流沒山谷  
我來亦無事但令妄想拂塵盡明鏡空卽是如如佛舟輿喧曉行遵陸又循水  
菰蘆騰雨聲帆順風初轉雲開日現時岸近波平處萬山青靄浮斜陽在深樹

心地一清寧乾坤否還泰用茲慰衆情先立乎其大西山四祖信東山五祖忍  
更有南北山老祖共相證相證惟此心此心人人有願各悟此心勿拋之亂走  
吾來無所來吾語無所語但念阿彌陀寂光同常住

武昌精武體育會觀藝

都關國粹莫輕捐未必儒邊勝俠邊禮樂可追三代上

折旋進退皆中禮樂

因緣聽話十年

前宣統三年霍文甲創於滬上

刀光劍影和音合鶴屈猿伸古法傳別有一般新意趣中西同化

若天然

園中晚步

幾度徘徊向夕陽鳥喧深樹蝶迷香入冬殘菊憐憔悴耐得西風透骨涼

琴園

清音在山水秋色混天人欲識琴中趣待尋園裏春

聞智常守岩季禪病天詩以傷之

智也秀不實守弱故可虞學勤情樸訥禪懶性清娛齋志今皆沒憐才世豈孤

况予曾攝受一日亦師徒

偶成甲子

橫斜一樹梅餘白疎落幾株桃始紅暫向抱冰臺上望暮寒猶自怯春風  
幾片梨雲湛碧清連翩仙袂御風輕願憑一曲鈞天樂唱作人間世太平

贈出塵杜多井序

久欽寶慶點石庵尊美公之風出塵杜多繼其懿德頃以赴明州之便訪予  
於佛學院書此爲贈

德行仰精苦語言能樸真聊將意無盡寄向一帆春

贈四明安心頭陀井序

予昔與甬上諸德倡佛教孤兒院傳董事硯雲兩赴南洋募捐尤力甲子春  
暮來武昌訪予佛學院則焦顛破衲已安心作頭陀矣書此贈之

久別明州侶相逢事若何安然心不住萬里一頭陀

剪刀峽宋園小憩



瀟瀟風雨一溪清  
山色湖光喜乍晴  
獨擅匡廬泉石勝  
雙峯如剪剪江城  
月下由牯嶺翻擲筆  
峯回大林

茂林深谷萬燈明  
謾謾松濤月下鳴  
擲筆峯頭仙綽約  
雲端飄渺落歌聲  
鎮江超岸寺釣鰲亭

一江橫臥作龍腥  
波面金焦兩角青  
古寺鐘聲超覺岸  
三山浮玉釣鰲亭  
宿揚州萬壽寺

一繫維揚古渡舟  
曼陀花雨戒幢浮  
到來客有如歸樂  
佛國恬然夢又遊  
揚城夏舫

泛來邗水一舟輕  
繞郭波光照影清  
欲拾繁華舊時夢  
舞風楊柳亂啼鶯  
五亭橋

江淮之間奇觀多  
一橋五亭橫大河  
橋底幽涼生襟袖  
清風謾謾來香荷  
遊平山堂

平山近水一堂延  
茗煮江南第五泉  
却憶畫蘭老禪友  
林間閒佇靜聞蟬

小金山

小金山在水中央門對徐園垂綠楊忽憶西湖舊遊處參天涼篠蕩荷香

泰州古松菴題壁

盤曲千年一古松凌空夭矯宛如龍莫教拔地高飛去霖雨蒼生時未逢

甲子夏偕揚郡諸名緇遊泰州泰山至小西湖瞻岳武穆父子遺像

國倚軍威似泰山名城自是重人間小西湖上瞻遺像煮茗同消半日閒

常惺等偕遊泰縣公園題壁

十畝園開淺草場一亭風納白蓮香小河隔斷人烟外古木幽蟬各自涼

泰縣圖書館

夕陽新雨挂長虹四壁圖書一館崇寂歷幽庭花自落不關蕭瑟動秋風

泰縣雨聲寺

平原浩蕩舞高粱乘得輕風十里涼花雨聲中動鐘梵且攜明月破炎荒

和錢誠善原韻書篋贈培安方丈

暫來光孝說維摩露地紛馳大白車火宅從知原佛國淤泥真見出蓮華不思  
議法心無住入律行時手密又萬鏡羅空森主伴月明鐘梵夜交加

潤州鶴林寺

飛來聽法縞衣仙拜石遙遙有半顛黃鶴山前鶴林寺曉鐘聲動萬山煙

鶴林新築

說法天花散爲雨聽經仙鶴列成林沒圈點處誰栖泊湛湛靈光古到今

懷四川寄烏尤寺

隔岸猿啼萬木秋烏尤山寺俯江流青城月色峨眉雪二十年來夢益州

中秋和隱塵院護原韻

萬方正多難秋月又圓明忽悟塵勞海原爲法樂城大悲來地獄至德發天聲  
翹首瞻空際無言意自傾

哀能守聖功

能守聖功者翹然智且仁輔吾纔一二載捨世未三旬末法真堪痛天身豈夙因

大慈乍埋骨哀爾倍傷神

曉發下關

一江終古自潺湲又薄晨曦出下關靜海沉沉咽律寺秋風瑟瑟撼獅山側聞  
塵市雜歌哭長揖人天謝往還半壁東南新涕淚百身大患未能刪

夢起

安危顯晦等閒過煩擾翻因得靜和佛性不曾無狗子龍靈亦復有猪婆方圓  
紆曲飛黃鶴消息盈虛示素娥藏鹿覆蕉秋夢足醒來始覺笑人多

雪竇寺八詠

山抱溪迴展畫圖翠毛獅子走文殊忽然細雨飛空下樹杪含來串串珠

含珠林

杖藜扶欲向山行默祝天空放晚晴好到妙高臺上去萬松新霽聽溪鳴

妙高臺

盡日風橫更雨斜崖懸千丈瀑飛花安能立向斜陽望披作斑斕五彩袈

千丈崖

高高山頂絕人烟獨臥蒼茫不計年大陸於今走狼虎吼聲何日起沉眠

獅子岩

一重雲又一重山入盡雲山始到關卻憶來時亭外路杪蘿雨漲綠成灣

入山亭

荒寒洗盡世繁華自掘松根自摘茶一掬流泉清可煮把將茆蓋臥烟霞寒華谷  
御書碑  
應夢名山宋帝書飛龍不樂樂潛魚世間天子林中衲自足何須更羨餘  
四明山脈出天台積雪春融竇始開亭鎖青峯橋作鑰白龍飛逐玉龍來青鎖橋

和保國寺古蹟八首

馬鞍山上幾登攀笑顧羣巒列兩班傳捨驃騎將軍宅伽藍初建號靈山山門勝  
月印池中水映天圓光蕩漾耀金蓮涵空一碧澄無滓影攝西方在玉淵淨土池

佛殿穹窿關藝術神工鬼斧世驚奇德賢尊者祥符建九百年前有此師祥符殿  
志山須有志山才新志還因舊志裁舒得一毫同刹海拈莖草亦作如來志書碑

遠看真同采錦堆閒花滿地向春開築亭要乞松雲護免被風吹又一回疊錦亭  
曉來望日且登臺象鼻峯迴舞綵萊雲外一聲清磬遠杖藜扶我落山來望日臺

岸邊猶有石碑存指點遊人到寺門流水一溪山內外濯纓濯足辨清溷石柱碑  
體露堂堂不用搜好如僧吃木饅頭羚羊挂角無消息曳尾靈龜迹已留木饅頭

清涼山北臺乙丑



北臺收盡五臺奇，俛視羣峯若小兒。極目高山難過此，微聞流水逝如斯。親逢四月餘冰雪，似入三禪伏見思。一碧無雲風浩浩，清涼法界吼青獅。

由常州遊無錫惠泉錫山白雲洞梅園諸勝

常錫民風和，且厚自求多福有。來源如何一樣遭，兵劫滿目瘡痍未復元。綠浪翻風蕩客情，錫山無錫惠泉清。白雲洞下多仙趣，一塔龍光湧化城。山澄水映景清臞，一角梅園瞰太湖。紅瘦綠肥春事了，子規啼罷聽鷓鴣。

玲瓏巖和寄老題壁

清涼覓何處，寒翠洞中探。苔壁晃金綠，籐巖湛寶藍。靈龍幻奇石，仙鼠穴幽龕。一句超今古，禪宗仰老參。

重謁放羊蓬壽臧並祝淨心老和尚古稀

牧得烏牛變白牛，放羊山上示真修。森林五里豐功在，菡萏千峯瑞靄浮。三界夢醒潭底月，十虛吞吐海中漚。他年矍鑠耄而耄，行腳當逢老趙州。

羅漢寮納涼

羅漢當年曾澗開淨公新築夢重來畫禪超妙僧絲筆碑偈沉雄摩詰才雨後  
蛩潮振林谷峯前竦影幻樓臺納涼相對成清咏同赴楞伽山上回

天童別文質和尚

兩月同居大鑑堂青山不動白雲忙晨風十里遙相送情比鄮溪流水長

廬山雜詠

廬山猶是舊廬山四海緇衣任往還人事古今多變換石溪煙雨自潺湲

臺灣遊記十年來

指善慧

牯嶺重逢意興恢說法談經花雨遍一舟東渡何蓬萊

嵐光橫戶牖雲影渡林溪蒼翠涵空碧千峯與額齊

廬山有奇景煙雨幻無端一味清涼裏風聲六月寒

撈空潭底月剪却嶺頭雲立向天橋上超然孰與羣

繪得西湖影匡廬寫更真誰知衆生界同是畫中人

大林秋夜

山溪向暮氣森蕭激石聲騰五木橋眉月纖纖畫峯面目星朗朗射松梢牯牛

燈市夜如海蟬翼吟園秋若潮雲脚忽撐天欲破大林煙雨看連朝

由大林朝馬祖

乍觀只道雲高下雲退方知山不平茆舍三家添野景湖光百里蕩空晴凋零  
佛法悲今日創立禪林訪古型寂寂祖師無覓處西江吸盡日孤明

日本贈友

蓬萊仙島昔曾遊九載重來值暮秋漠漠京塵新舊雨一堂相聚大亞洲

木村泰賢

當年西渡話唐僧今日新修一切經握美擒歐吾輩事法輪西轉萬山青

高楠順次郎

年來沙磧隔重重地底潛流水自通今日憑君新努力還將佛法換歐風

梅野水野

慈恩一脈千年在深密三時萬古新諸識所緣唯識現雙泯影質最心親

佐伯定胤

永平寺卽景

東亞有高會紅葉正深秋塵海佛光普關山客夢悠久懷永平寺來作采真游

一笑忘言說風徽仰古猷

和神戸諸君送別

了知真際卽塵寰當體如如絕往還自是本來無面目不關身住在廬山  
昔年曾作采真遊蓬島重登路更修歷覽兩京名勝徧也同楚尾接吳頭  
不思議法寄音輪且向塵寰索解人安住無生本清淨肉軀泡影亦真身

和夏惟喆題超果寺一覽樓

丙寅

極目雲間不見山危樓徙眺幾憑欄撩人野景饒生趣拂耳春風怯曉寒二柳  
清漪空結想九峯晴翠遠翻瀾遐思不覺低徊久五里茸城日已殘

雪廬消暑

半角僧園數樹蟬宛然如夢復如烟若除煩惱人皆佛暫得清涼客亦仙詩意  
已能超物象道情原不落言詮光明只有菩提路快馬欣看着一鞭

星洲赴楊雲溪君別墅

閒駕風車向郊野忽從塵市入山林幻形偶在人間寄樂土還宜海外尋一路  
蕉香薰欲醉兩行椰葉綠成陰混然不用華夷辨涵蓋乾坤只此心

寓樟乳陳文烈君別墅

心海潮中騰覺音此音今在海潮心天風浩浩閒吟引濤雪翻翻冷意侵沙上不妨人偶語椰間也許客相尋避秦莫作桃源夢常住靈山無古今

贈黃葆光

剎海吞毛孔天龍繞筆端千年長暗室照破一燈寒

自星洲至柔佛

百年星島關炎荒海上行車架鐵梁一嶼蒼茫柔佛國萬民淳樸古義皇桃花源裏不知漢蕉綠蔭中猶說唐白日火馳亦良苦盍來林下共清涼

柔佛遊

修造善因藉柔佛護持福果要剛王王宮猶見唐儀仗佛殿俄成回教堂陵寢不無輪奐美溪流也帶荔枝香霞天錦地多清麗風景鮮妍憶日光

題唐大圓禮樂之真義及其應用

衣冠容止學周公性理精神與佛同都攝六根齊入定山河骨肉大圓通

南普陀題石



南海普陀崇佛刹虎溪白鹿擬匡廬千巖百洞奇難妝隕石飛星古所都水鳥  
皆談不生法雲林巧繪太平圖山獅十八驚呼起一吼當令萬象蘇

閒居

閒居得吟侶覓句適園亭風舞池邊柳波搖水上萍紅燈迺夕照黃葉落空庭  
將此陶然趣相看兩眼青

題廬讀書圖

丁卯

一塵剖出大千界萬象收歸不二廬工畫有師心自妙雙瞳秋水湛靈虛

消夏靈隱

靜晝敲殘數局棋飛來峯下獨尋詩冷泉盈掬寒生齒怪石成林翠撲眉洞裏  
閒窺天一線池邊小立雨初絲壑雷乍振炎氛淨恰是清涼自在時

爲靈隱玄堂主題綠天菴懷素草書

不上廬山忽二年又因浣暑到湖邊觀雲聽雨聊云爾憤世憂時亦偶然靜裏  
天機懷素草客中秋興杜陵篇得心應手臻神妙都入石門文字禪

韜光訪李圓淨次韜光禪師韻

汲得山中竹引泉烹茶飲罷倚松眠靜觀綠葉成紅葉欲伴金蓮種玉蓮古洞  
藏雲遙瞰海修篁蔽日漫連天萬緣息後無他事一片冰心供佛前

西湖夏夜

上界繁星隔岸燈湖天一碧萬光騰絃歌細細風徐度盪向輕舟氣尙蒸  
和玉皇兄立秋有感原韻

靜居觀物變渾欲入山深炎逐微陰盡秋驚涼雨侵幾曾憐白壁祇有拜黃金  
卻笑騎牛背人人牛跡尋

偕玉慧觀訪卍字草堂盧居士

攜將海上優遊侶來訪山中高隱廬熱惱清涼一心造娑婆極樂不分居

靈隱度夏臨別次玉監院均謝慧老

白浪黃塵莽送迎勞人笑又涉途程回天望切慈悲佛遍地哀深草木兵且喜  
有緣曾目擊未能無住奈心生塔中半座承分我五百由旬賴此城

題王籀瘞蘭亭硯榻

死生亦大蘭亭序物在人亡思惘然懷古感今心一轍驗知薪盡火猶傳

題籀瘞藏佛

千佛萬佛一佛真藏在深深不露身籀空諸有住無住方知在人祇卽人

泖塔口占

三泖連天秋水長誰舒孤掌水中央樹顛湧出玲瓏塔澄照荒荒淹夕陽

暮登雪竇

習習涼風拂袖開翻空綠浪接崔嵬牛隨牧唱循坡下鳥帶郵烟傍樹回欲使輿夫增健步閑編路客說抬財亭名善息堪深味幾個英雄善息來

曉遊千丈崖登妙高臺

秋雪晴翻崖下瀑曉風涼湧嶺頭濤雲松露草非他物誰識靈峯是妙高

蔣公介石招與吳君禮卿張君文白同遊千丈崖下

怪石幽崖下瘦篁深谷中白雲飛片片青霧溼濛濛仰視壁上樹俯窺潭底龍

相期瀑聲裏共證耳圓通

溪口藏書樓

清淺剡溪口鬱然靈秀鍾穩如鞍在馬

名馬  
鞍山

勢若首昂龍

亦名  
龍山

獅頰青掩映魚

鱗翠疊重藏書濬民智層閣倚長松

丁卯中秋在溪口藏書樓與蔣總司令蔣夫人張文白處長吳禮卿師長

等看月講心經

天上人間跡未周攜將布袋又明州看山雨阻懷前度

甲子冬至至雪  
寶因雨未遊

讓國風高快

此遊千古相知有明月一生難忘是中秋劇憐黑野鬥羣魅欲放慈光照五洲

和玉皇禪友贈蔣總司令歸隱原韻

黨國安危繫青山未是歸出曾驚鬼侮退豈貽人譏此日藏雲豹他年縛海豨  
大雄能大忍莫使此心違

和玉皇禪友贈妙峯庵主生壙落成韻

野老何須蹙一塵堂堂無位露真人妙高峯半龍酣戰壞劫灰中火又新鯤化

曾經九萬里龜年豈羨八千春立錐留得烟霞地况有梅花更不貧

宿虎溪巖次吳綺均

拳石獨超羣風來吼欲聞活泉終到海幽壑遠生雲樹杪潮青漲巖端月白分  
市烟凝鷺島樓外日初曛

游寶山岩

空手寶山來寶山空手回白雲歸洞隱青樹傍巖栽梵唱傳靈谷天香繞佛臺  
聖泉清可鑑一水碧潌洄

與會泉長老陳定謨君游漳州南山寺

鷺江如鏡碧涵空兩岸青山曉夢中驚破煙波數聲笛報君船已到浮宮  
飛車撲翠向漳城山色雲光照眼明忽在西新橋上過驛亭回首海澄清  
石碼俄然又小停野風相送晚禾青水頭別有空靈趣隔岸奇峯玉作屏  
炎方九月猶揮汗何處陰濃覓午涼卻喜溫泉新浴罷一庭秋雨送斜陽  
雨後南山境欲仙書聲梵唱徹林泉碧空雲淨秋心遠劇夢詩情月共圓



開元遺跡已茫茫細柳營依綠鳳凰仰止亭中一憑眺七星點地暮煙蒼

訪白雲巖朱熹解經處吟八景

卓錫飛泉引興長

卓錫飛泉

幽巖共覓白雲鄉棠陰晷影移蘿石

棠陰晷影及何有石

意果心園

證芋香

意果園

百草庭前花爛漫萬松關上鳥笙簧

百草亭及松關鳥語

螺螄沒尾憑攜取

有山

沒尾螺傳係朱熹食餘棄而復活陳君攜數枚歸

歸路車追晚浦航

晚浦歸航

靈隱曉行

曲徑沿溪走雲林西復西暮楸驚鳥起巖草欲人齊續續吠多犬微微聞一鷄  
好留乾淨土處處著輪蹄

崇德訪古華禪兄詠福嚴寺四景

十年前憶舊煙蘿回首雲峯歲月磨數杵鐘聲聞石補一灣流水夕陽多

石補鐘

揮金贈石兩英豪留得人間風節高好與禪林並千古天中山傍湧雲濤

縹雲峯

千水千山一鉢瓶紅塵白浪醉難醒歸來萬事齊收拾留得高瓢挂此亭

挂瓢亭

古鏡當臺着眼看陰陽未判寶光寒等閒嘗盡人生味只是甜鹹苦辣酸

陰陽鏡

孤山探梅

白堤行盡綠波微，嫩柳如煙兩岸霏。  
特地孤山訪梅友，也憐憔悴不勝衣。

戊辰立春偶成

微雪明明見寒雲，密密封遠山。  
增黯澹流水自叮咛，人已度新歲。  
天猶滯舊冬，乾坤不終蟄。  
一震起潛龍。

和昱山禪兄韻三首

春滿湖山花滿林，連朝陰雨阻探尋。  
老天不解如人意，何日方能慰此心。  
儻得狂風騰虎嘯，盡教枯木作龍吟。  
浮雲掃卻晴空現，湧出紅曦換綠霖。

朝辭南海雲暮飲西湖水，刹那發真照十方。  
虛空墜化爲春雨，聲不露日月面無二。  
無二分何處更相見。

不從山上見，卽向海邊逢。  
恰是紅初瘦，悠然綠正濃。  
深懷明太祖，來弔宋高宗。  
吸盡西江水，迴龍去作龍。

應蔣公介石招赴首都湯山途次讀劉靈華樂天却病詩次夢予原韻題

天下泰平書

昏發春申浦晨聽鼓樓鼓新都煥煥塵不揚禾黍桑麻化時雨干戈雲擾十六年此來重見真民主古賢今聖心理通青天白日開鴻濛孫公倡之蔣公繼狐鼠豺狼一掃空湯山雅遊溫泉浴却病詩句吟玲瓏偃軍修政民樂業女歌男舞娛僇虫太平書布觀音教世界大同天下公

西貢和李仲卓原韻

潭水空明月自來只須心地好培栽根塵識界歸清淨贏得蓮花遍海開

用前韻贈牛渚居士

雅量恢恢客遠來應曾慧種福田栽善財此是南詢地彈指華嚴樓閣開

赴歐舟次印度洋七律三首

扁舟萬里涉重洋身命經於一法瑯夜色昨曾窺月暈秋濤今欲闢天荒安知彼岸非當處偏在炎鄉得晚涼悟徹空間無自性心能轉物卽爲王  
浪湧羣巒鱷嘯林洋洋盈耳是濤音雖無大陸行舟力也起中流擊楫心來向

梵方窺古月欲從冥壑擁遺琛青天碧海何窮意付與鮫人取次吟

山飛海立門蛟鼉浩蕩天風助壯歌撲眼濤花纔一瞥游心聚沫得三摩星星

浪彩瑩無盡線線光波織未訛認取瀑流恆轉力頻翻新樣不辭多

此下失遊埃及詩

### 巴黎紀遊

一百年前拿破崙武功煊赫凱旋門微溫電火埋新骨士女紛來弔戰魂

凱旋門

鐵塔四百八十丈梯雲躡霧上青霄巴黎一覽無餘景暮色蒼茫動四郊

大鐵塔

蠟塑今人又古人望中真假費推尋數來要算誰奇怪慕索里尼張作霖

蠟人館

八鏡交輝一方丈重重無盡入華藏三番變現妙莊嚴都在心光相映上

魔術宮

高處巋然古教堂紛陳像設燭騰光聖心蕩蕩無名相悟得真心聖亦亡

聖心堂

古物紛陳不暇觀壁間油畫色斑斕金雕石刻多工巧埃字形完識未難

羅浮院

天工人巧瑩花木樂女詩翁刻石金到此胸襟一清曠宛然城市有山林

盧森堡

自由平等發源地紀念碑成監獄空佛言三界如牢獄超出之時成大雄

巴士梯

交通此是中心點世界於今軌大同石像峨峨出塵表也曾流盼駐遊踪

交通圈

前身應是李青蓮曾學崑崙太乙仙一抹斜陽秋樹影詩人居處自超然

崑崙郵

東方民族式微多古物凋殘半逝波卻藉西人廣收檢碎金斷石供摩挲

東方院

上海哈同此哈根遙遙相對兩名園別饒東化天然趣世界環游此有門

哈根園

動植飛潛集萬生個中邱壑足幽清旅居却喜鄰仙苑閑挹晨熹聽鳥聲

萬生苑

漫將國是訊巴黎物論紛紛亦自齊卻憶華筵秋月滿一堂人事話東西

宴國館

佛說心如工畫師見君如見此心奇室羅種種世間相光景無邊得總持

石龍室

五洲百國車同軌異獸珍禽聚一園莫謂獅豹無佛性術人能與話親恩

動物園

市囂聲盡東郊外萬木葱蘢見大林一島玲瓏橫隔處恍聞山水有清音

東郊林

和章盈五君見贈原韻

卻從溫故獲知新作個鎔今鑄古人交徧西方文化綫轉成一致法音輪言思  
盡處非空有現實超然出幻真好向微塵剖經卷生無生義與重伸

露堂堂地無遮隔物理人情亦聖師未許小成紛至德從來大悟出深疑忽知  
火在燈非別現證橋流水不移一霎心光吞太極乾坤何處着貪癡



和王景岐公使韻

衛國安民憶昔賢，綿綿史澤五千年。興邦已是經多難，到海終須會百川。古柏  
幹貞因理直，臘梅花放得春先。羣陰剝盡初陽復，得賞清和二月天。

英比雜詠

昔曾法界說三重，今又三重運動逢。好向茫茫人海裏，與君攜手顯心宗。達斯社

海鄉遙訪哲人居，日麗風和意自舒。一路秋山呈百媚，層樓四望豁靈裾。羅素山

落葉滿山風自掃，斜陽萬樹影蕭蕭。明湖一鏡涵秋色，野客閒吟破寂寥。比京林

市廛行盡得森林，黃葉飛殘萬木深。纔愛草原凝冷翠，一車俄已霧沉沉。郊外車

滑鐵廬傾一世雄，可憐最後五分鐘。若教此戰成全勝，倘建秦皇混合功。滑鐵廬

依山凭水舊皇宮，巧合天人見化工。莽莽菲洲呈地寶，菟來一室亦神通。博物館

四十初度在柏林攝影自題

浮生四十今初度，幻質飄零尙未央。風燭無常願無盡，海天雲水正茫茫。

德國雜詠

西國其質中華心孔易老莊寢饋深精進更探大乘法真欲一爐冶古今

衛教授

剔燈談佛憶東京說法欣逢到福城河畔一車飛雪共水迴山轉見情深

卜公使

卜得萊因最勝區水環山擁雅人居雪中有客來相訪疑是南陽諸葛廬

施夫人

生物園西更鹿林皚然冰雪氣蕭森飛車幾度環全市景蹟紛羅次第尋

柏林市

哲人居處絕塵囂四野瑩然雪未消領略精神生活趣山林城市兩清超

倭鏗屋

### 題覺花園主集

若能通達五蘊空七覺因花徧界紅好以度他成自度扁舟不住海西東

### 紐約赴芝加哥車次閒平時哲已已

補陀山上題詩錄社稷壇中弔哲魂華族勛高洪武帝英年秀毓翠亨村權分

政治三民貫學闡知行一說存身仆黨興能建國同呼不死有精神

孫中山

兩度津門佛理論世呼菩薩豈無根中原首義歸人望北海高眠繫國魂先後

順時開總府去來因勢泯爭痕臨終一電稱朝野猶見人心直道存

黎黃陂

琴鳴蕉石證天遊曾向西湖共一舟萬木堂開多士集公車書上大名留未成

君憲長遺恨已變民風勇補修青島忽聞歸物化怒潮時正撼神州

康南海

漢水江城憶舊遊黃岡赤壁賦同舟文章早歲聲華溢政事終年感慨悠好學  
更能敦晚節高行自足繼前修徹觀無我空生死留有心光照九州

梁新會

由芝加哥至舊金山

曉車簾捲小窗寒玉野銀山入臥觀一路白埋岩石罅數峯青露柏松端晶光  
冉冉浮雲散木洞疎疎落葉斑意逐輕煙成薄霧邈然清味與天寬  
昨日曾從水面行今朝山頂路尤平遠峯深谷來窗几淺草長松作鏡屏百物  
紛陳春氣象一車移動活碁枰修途得此堪愉快努力加餐慰客情  
春遲北美先南美一入嘉州萬象新帶在溫和宜動植地多生趣洽天人牛羊  
遍野紛眠食花鳥迎風各笑嘖何礙境遷心亦變無邊光景倍精神  
飛車忽在金峯頂四望羣山落海濱纔喜雲光迴白日俄驚霧氣薄青門頃刻  
陰陽易昏照霎時升降變涼暄月灣花塢俱清絕一片禪心印碧痕

金門至克蘭

海外還成海灣中更有灣舟車兩重渡水陸一連環落日浮鷗影低雲隔岸山  
優遊聊自適憑檻意閒閒

金門留別

流水行雲不可留他年重見話前遊應憐夜半蛾眉月猶照金門古渡頭

題靈隱所藏彭氏繡佛

繡出憑君看銀針不度人絲絲生命物縷縷法王身光色映交遍乾坤露獨尊  
應如碧潭月非幻亦非真

與玉皇監院遊玉皇山

玉皇山上玉皇遊細雨斜風汗不流鷓鴣聲聲仙氣迥蜻蜓點點藥香浮湖心  
浪撼三蓬島江角雲迴八卦洲絕頂登臨同俯仰煙波萬頃意悠悠

姑蘇遊蹤

廿載靈巖憶舊遊岩嶢塔寺望中收前塵影事模糊甚山自凝然水自流  
入山初覺綠陰寒登閣遙觀白浪寬安得春深香雪海萬梅花擁一蒲團

舟過靈巖  
海訪香雪

清奇古怪又靈飛，社柏三三挹翠微。卻愛湖山秋色裏，鐘聲數杵送斜暉。  
同上松風水月臺，桃花八月訝新開。曾聞物變關時兆，但願呈祥勿報災。

柏封靈飛  
秋放

九華雜詩十首

舊遊依外姥，遙憶卅年前。大地經荒亂，秋波自渺然。一營森佛宇，萬戶網魚鮮。  
意逐孤帆遠，清吟破曉煙。

縱覽山三疊，橫觀峯九華。層巒環遠浦，疊浪擁輕槎。不減西湖美，平分秋色賒。  
繫舟登岸處，煙樹認錢家。

嶺際午鐘清，羣山夾道橫。清流沿曲澗，修竹動秋聲。好風迎遠客，微雨潤荒晴。  
未倦登臨意，更期向上行。

直向九華上，小橋更大橋。有庵堪歇宿，無境不逍遙。天半垂甘露，雲中見野樵。  
剪燈同夜話，高躡待明朝。

自是吾無隱，甜香動木樨。雲中金粟影，燈下草蟲啼。萬朵芙蓉放，數峯煙雨低。  
祇園萃靈秀，化網此綱提。



新羅金喬覺中國地藏王肉塔千年在化城雙印藏中秋逢久旱甘雨勝清光  
無限朝山客提燈過市場

五百由旬半團圞入化城新參僧教育無盡佛明燈尊重六和合造成萬善行

地觀大悲願共矢此精誠

寄塵時辦九華佛學院

暮色秋光裏東厓景物妍卻留今夜看未減一分圓澄海銀魚躍輕紗玉鏡懸  
清談不忍睡欹枕聽流泉

容虛等陪遊

欲窮九華勝更上上天臺絡繹茅菴結蜿蜒石磴開拜經覓遺蹟奇石孕靈胎  
秋色紅黃紫斑斕錦繡堆

絕頂攬羣峯巍然插太空溪籐青掩映巖草碧玲瓏雲漱一拳石松飛百歲宮  
鐘聲催別思回首夕陽紅

### 新京遊蹤

朱墓昔年傑孫陵現代尊一杯靈谷水暫以息征輪  
後湖五洲景曉莊聯洽村兩般新建設物質與精神

寶華山寺

酣戰龍潭跡未亡  
荒邱枯草向朝陽  
山行十里初佳境  
寺擁千華古覺場  
布薩壇前觀律象  
拜經臺畔擷禪芳  
從容孰與遊中道  
一宿蘧然夢楚狂

棲霞山寺

新構營古刹  
秋葉燦餘霞  
白鹿泉聲冷  
青鋒劍影斜  
荒林遺帝蹟  
奇石散天葩  
翠浪浮雲遠  
歸途興味賒

自廈門南普陀至泉州寓開元寺留題

朝出南普陀  
入海天初白  
捨艇登汽輪  
嗚嗚笛聲發  
人物堆積中  
風浪相激拍  
促坐三四時  
疲若經終日  
聯袂符八仙  
安然彼岸達  
遵陸購飛車  
肩摩轂衝擊  
細雨青濛濛  
待久喜行急  
泉州忽在望  
木橋六七八  
抵城換小車  
街市行雜沓  
頃刻至開元  
略識氣象闊  
舊宇紛錯間  
新構亦成列  
居我藏經樓  
城廛似林谷  
戎服混緇衣  
華筵參歐式  
出觀甘露井  
戒壇何卓越  
舍那千華臺  
八部威神赫  
天殿閔且深  
座供五方佛  
殿後雙石柱  
美術工彫刻  
儀同唐密宗  
真言存血脈

誰垂金剛乘來敷曼怛囉恢恢轉道師誓願興茲剌耿耿葉居士與之相應答  
導觀慈兒院斑爛陳古物字有晦庵聯亦有瑞圖額工讀教羣孤士林咸刮目  
更闢養耄堂靜修得安樂幼育老有歸人生大事畢以成自他利便爲活菩薩  
聞昔紫雲垂桑麻開佛國乃今歎觀止偉哉東西塔

泉州贈周伯道

古屋半千歲茶花春一枝無慚忠勉後能以佛爲師

泉州承天寺崇福寺留題

開元崇福又承天鼎足泉州豈偶然門進月臺觀七塔社開廬阜聳千蓮不存  
尼相餘二衆難得僧林具四緣更訪荒郊鐵羅漢雙拳十畝闢農禪

福建無尼

泉州聽周子秀彈琴

春山春景叶春絃花在枝頭月在天靜坐焚香彈一曲泠泠然似御風仙

庚午春遊洛陽橋

洛陽江上萬安橋一里橋通百里潮曾是洛陽風景好青山紅屋水迢迢

四面煙巒淡欲無，春江潮漲似西湖。  
婆娑塔影長虹護，此景真堪入畫圖。

泉州東湖贈蘇慧純

潮聲聽罷更東湖，不是東坡也姓蘇。  
尚有荷香傳夏日，泉州入景未荒蕪。

贈泉州送行者

聲聲爆竹出泉州，送客情殷到站頭。  
卻愛娥江新漲後，濤花沫聚夾湍流。

與轉蓬弘一芝峯之小雪峯

寒郊卅里去，城東纔過青溪便不同。  
林翠蔭含山外路，蕉香風送寺前鐘。  
虎蹤笑覓太虛洞，詩窟吟留如幻松。  
此夕雪峯逢歲盡，挑燈共話古禪宗。

題太虛洞

雪峯晏坐太虛洞，松江演說太虛亭。  
祇此太虛無彼此，宛然心境兩俱冥。

遊雲頂巖登廈島最高峯

損腰未倦登山興，得得扶籃造極來。  
路畔澄潭明鏡映，巖前叢樹翠屏開。  
寒生六月留雲洞，高越羣峯觀日臺。  
一覽廈門全境盡，海天空闊此蓬萊。

和歐陽小純贈詩原韻

詩人策杖叩禪關，幾度行吟怪石間。  
萬樹幽松依曲徑，一泓清水出深山。  
靜觀雲岫渾無賴，卻羨林禽自在閒。  
付與鐘聲自生滅，滿階春草未須刪。

天目山紀遊

庚午

車聲轆轤雨霏霏，纔到餘杭又轉機。  
卻笑臨安安未得，溪山深處化龍飛。  
暮色蒼茫雨欲收，白雲如練鎖峯頭。  
老天未肯張天目，暗聽松濤挾翠流。  
天目東南西北中，禪源寺繼古宗風。  
雨花亭跨蟠龍澗，太子庵欹翔鳳峯。  
萬杉掩映湛清海，一澗潺湲瀉碧流。  
積靄涼煙開闔裏，忽晴忽雨幻林邱。  
高峯一塔含獅口，更見中峯塔倚天。  
洗鉢泉流餘潤在，飛身已到樹王前。  
一參獅子正宗禪，山色溪聲遍大千。  
崖洞幽奇老天目，松靈石怪出天然。  
新東街接兩茅蓬，俯覽微聞遠寺鐘。  
獨擅靈奇四方佛，花開竹塢一坪紅。  
鳳嘯溪喧渾不辨，聲聲湧上枕邊來。  
出山策杖天方曉，出得山圍霧亦開。  
豬頭嶺下一鄉村，步步登高躡壁根。  
鹿角拔開攀虎尾，桐花滿地着春痕。



頃刻陰晴變化分，昭明庵畔霧紛紛。東山霖雨蒼生望，那惜松間百尺雲。  
十八螺旋十一亭，銀河倒瀉破空冥。玉龍天畔高飛處，數杵鐘聲度翠屏。  
盡日東山白霧漫，不將真面與人看。龍泉澗接茗溪渡，回首悠悠見遠巒。

韓清淨居士等招遊香山別墅

忽到香山古寺前，相偕攜笠向林泉。雨香一徑闌風度，心迹雙清瓔珞懸。塵外  
色聲皆卽佛雲中，鷄犬亦如仙人天。擾擾原無事，且向松陰枕石眠。

青島遊痕

岡巒交錯觀青島，汶海張螯踞碧波。綠樹紅檣相掩映，天風仙影舞傞傞。  
一世之雄德意志，當年曾此費經營。而今遺蹟供憑弔，山自蒼然海自清。  
怪石嵒舒拔翠叢，勞山勞慮洗難空。林中小坐聽流水，卻喜相逢呂道翁。  
自宜昌入三峽，用杜甫詠懷古蹟五首之四韻。

曉發彝陵暮巫峽，雲山望阻永安宮。

舟擬夜泊夔州，觀白帝諸勝，因水漲僅止巫山。

明妃怨渺秋聲外，蜀主哀

沉夕照中。

秣歸有明妃村，劉備連營亦在巴東間。

古廟高唐祀神女，危崖仄徑走樵翁。箇中奇險探難

盡灘折峯回刻不同

十九年秋自宜昌經三峽入夔渝用杜工部秋興八首韻

解維江市向崖林初覺蕭然秋氣森袖拂峽風驚浪激笠披巖霧豁天陰炊烟  
漠漠黃陵腳冲積層層碧海心馬肺牛肝入詩料宛如蔬筍赴廚砧

舟逐漩流行勢斜挹來秋爽倍清華窗移靜翠千巖樹灘送飛湍百里槎忽對

蜀江懷晉谷

三夾水道似  
五台山徑

似聞梵唱雜胡笳岫雲雲岫奇難狀佛髻芙蓉燦萬花

昭君村外挹斜暉烟景家家浴翠微青鹿角前灘更急黃牛背上雨初飛每因  
涉世心常倦卻喜看山願未違忽已巴東回首遠巫峯十二亂雲肥

洞戶巖扉布若棋仙凡未必異歡悲穴居卻憶中州地土屋依然太古時灑灑  
堆頭飛沫濺瞿唐峽口急流馳依山凭水夔州府形勢悠然繫遠思

輕舟已過數重山回眺孤城縹渺間兩岸濤風喧石壁萬家烟雨蔽江關人逢  
世亂思伊呂誰復心齋樂孔顏檻外羣巒留不住側峯橫嶺各成班。

一塔岩嶢矗嶺頭雲陽嵐翠盪晴秋松杉蔭合桓侯廟猿鳥聲傳杜宇愁逸態

脩然思野鶴閑情聊爾狎江鷗蜀中自古多名士豔說英雄冠九州  
灤田麓舍著農功翠柏青畦入堊中石竇寨孤擎塔寺鄴都城僻撼江風峯間  
疊疊晴雲白林罅層層溼土紅領略田家淳樸趣優遊猶是葛天翁  
波平岸闊嶺逶迤雨後涪陵水滿陂惟蜀獨生黃桷樹挂猿空賸綠蘿枝莫留  
短景駐長壽不覺舟行見岸移雉堞參差金碧影江城天際晚霞垂

白帝城

用杜甫武侯廟韻

昭烈託孤處荒城遺恨長江關鄰奉節山勢接雲陽

八陣圖

用杜甫韻

八陣布魚腹纍然尚有圖三分天下勢決策在和吳

川東雜詠

用杜甫夔州歌十絕句韻

城寨臨江抱萬山市場新築出雲間歐風直欲摹香島株守應難再閉關

萬縣

人在新城鬼舊城陰陽異實卻同名險灘念彼觀音力名以觀音亦物情

鄴都

巴水江頭衆水朝况逢昏暮異晨朝獅山賴有慈雲護梵樂冷然勝聽韶

宿獅子山慈雲

寺

山似浮龜水接天人烟密集滿坡顛重街複市盤空上處處梯雲百級懸重慶市

寺擁長安十萬家宏開學社佛拈花洒來法雨俱蒙潤士女紛紛長覺芽長安寺佛

滿地紅顏歸白骨幾人智種長靈苗茫茫大夢徒生死大覺知歸那一朝白骨塔

花木禪房曲徑通雲林羅漢此遺風一堂宴會皆英俊政學軍商佛化中羅漢寺

報恩佛學勤傳習應是僧伽善合時佛法契機方契理隨宜設化更何疑報恩寺佛學傳

所習

甘苦恩怨一霎忘轉成法界海泉長儼然華藏不思議超脫世間炎與涼甘海泉華嚴法

會

嘉陵江景擬蓬壺瓷器機絲總不無一日輪舟三百里合川城已到東隅由重慶赴合川

中道

沿嘉陵江赴成都用杜甫有感五首韻

嘉陵小二峽靈閣自年年瀝鼻飛銀瀑觀音鎖碧天溫泉二巖合浮石半灘邊

饒有園林趣遙瞻意興騫小二峽

劍氣騰朱雀山氛靖白狼民痼孰垂恤營壘每相望低首客投店露脰婦沒裳

幾區新市政開泰向三陽合潼路

陂陀潼遂路往往亦平均古寺投開善公園布化春靈泉山景好廣德佛風新

處處森軍令斯民盡僕臣潼遂路

安居阻泥瀟牢落赴三朝樂至鹽井汲天池荷葉凋綠疇烟縹渺赤嶺日迢遙

一路如園苑優遊駕小輶遂簡路

直達成都去於今更不疑車經鴉口險澗跳虎脰遲飛渡龍泉驛朗吟子美詞

民勤山水好何事徧瘡痍簡成路

中秋在遂寧梵雲山用杜甫滕王亭子二首原韻

行行竟滯梵雲山綿邈峨峯遠莫攀此夕團圞慶天上平生坎坷感人間露華

寒浸蟾三足霧縠微窺豹一斑已是中秋猶半路料難秋盡漢皋還

來看峨眉月依然虛此行林樓初瀉影鼓樂遠傳聲孰寂每孤坐憂吟聊慰情



清輝拂衣袂萬里蕩心旌

自成都至峨山用譚晴峯峨圖記勝三六韻

域中山脈溯崑崙獨有峨眉勢最尊畿外雙流穿舊邑一律新湛願王恩

發成都經舊邑

新律

彭眉山水擅奇能才毓三蘇得未曾志節文章共千古荒祠斜照愴秋陵

經彭山至眉山

游三蘇祠

驅車轆轤發眉山行樹層畦衆妙環驛到思蒙天未晚欲前還止雨留攀

宿思蒙場

綠雲紅旭湧東方波水烟林漠漠藏一盞豆漿甘若醴賢婆嶺上倦勞忘

賢婆嶺

白霧瑩然湧玉臺斷橋空翠萬松來土門坡上峨峯現月白天青眼界開

土門坡

徑如螺旋下山拖平步登高又一坡前去夾江今不遠木魚聲好透烟蘿

夾江道

夾江修竹蔽田廬白蠟研成玉版如雙福橋前峨縣望西峯落日彩霞舒

峨眉道

乍經微雨淨無氛遙矚峯峯繞白雲佛刹神祠半荒草華嚴塔畔佇晨曛

聖積寺

卓錫當年倚碧岑保甯猶自嗣徽音潺湲一澗瑜伽水流出殷勤老衲心

保甯寺

普照堂前報國亭重重樓殿接空青徑登善覺嶇崎甚御印欣觀古佛經

報國寺至二坪

深林夕照一聞鐘寺覓前溪伏虎蹤一枕淙淙流水曲曉樓松竹翠煙封

伏虎寺

虎溪仙石燦靈花綠樹蒼巖襯曉霞流水聲中塵解脫雷音宵絕覺皇家

雷音寺

華巖行過木涼遲雲篆樓空玉女池一氣純陽飛綠霧會燈回首赤城窺

華巖至會燈

叢山雙谷玉交枝雲外春流萬古時神水大峨天下秀凌雲太妙剔仙碑

神水閣大峨寺

歌鳳臺空叩水閣羣流會響海潮痕中峯頂上黃冠渺日午猶然霧鎖門

中峯寺

石鷄絲網聳青蓮危磴龍昇一指尖翠竹離離藏廣福綠雲深處白牛眠

龍昇崗廣福寺

清音閣下一二龍攢黑白縈迴氣象寬洗得牛心成佛智金剛捷徑上何難

清音閣轉金剛

坡

數峯尖破碧天嵐曲達牛心嶺上菴細雨懸巖登會佛一坡猴子費尋參

牛心寺會佛寺

大坪全露法王身神虎仙蛟勝迹存十大願王開淨土蒼茫雨霧掩明燈

淨土院

霧峯雲壑晝微明浩浩天池瀉玉聲象鼻巖根蛇倒退椿坪千佛午鐘鳴

洪椿坪千佛寺

雷鳴陰壑霧彌空澗轉巖迴步不同九九拐前奇險絕仙峯清磬落雲中

赴仙峯寺

遠山晴放曉霞凝九老緣深古洞燈更向望仙臺上望羣峯聳翠列層層九老洞望仙臺

橋渡仙巖挹眾峯枝枝青玉燦芙蓉遇仙一坐蓮花石洗象鑽天興更濃仙峯寺至洗象

寺

秋林五色彩霞霏象外超然發妙輝唯此大乘無二別白雲紅葉掩禪扉洗象寺至白雲

菴

陡絕令人意也消凌雲梯上踏青瑤好憑接引登金頂俯聽雷聲破寂寥雷洞坪接引殿

第一山頭瑞靄浮杪羅樹色豔清秋普賢行願將圓滿喜見花飛六出不第一山至喜見

亭

百尺盤龍傳古椿沉香塔上繖珠珍慧持空樹今何在猶見通天有肉身沉香塔等

行過天門石莫忙七賢橋下綠波塘雪花散遍普賢塔金頂還看白玉妝普賢塔等

金殿何年祖殿分佛光同現吉祥雲寒空雪霽霏青霧那得峯峯挂夕曛金祖殿

萬千佛影湧雲臺銀海頻翻雪浪開峨頂刹竿時起倒銅碑錫瓦半荒苔千萬佛頂及諸

刹

未能見佛已如仙足踏浮雲下九天記取蓮峯分路處華嚴飯熟翠微巔

下山至華嚴頂

至今同泛願王船採藥開山憶昔賢長老坪經息心所觀心初到萬年邊

下山赴萬年寺

羣巒崩崩水溪潺此是峨眉大本山三殿原來為一寺廢興分合幾循環

萬年三殿

出山無復費攀躋下蹬還須策杖扶轉過金龍白龍洞太平明月二橋題

下山道中

萬巖千壑秀難摹形勝龍門信不誣鐵索石船回首遠新詩一幅四峨眉圖

龍門洞

佛心無我大而公銅像嵯峨見化工同現普門千手眼好令魔外永潛蹤

大佛殿峨縣佛

教會

### 自峨眉返成都六絕

鎮子場初入樂山高山坡在翠屏間蘇溪一勺嘉陽水飯熟茶香夕照殷

峨嘉道中

十里桑榆繞郭青水光山色混空冥江聲一洗塵囂盡况有園林可小停

嘉州公園

嘉州大像久知名一聽秋江梵唱聲親見凌雲三六丈大蘇游處有餘清

大佛寺

半天鐘磬落烏尤形似烏龍聲似牛爾雅臺前一憑眺離堆終古峙中流

烏尤寺

青衣別島古離堆百仞凌雲大佛開也似金焦江上見空濛暮靄一舟回

江上

古都車發曉園新度嶺穿江騁絕塵遙指錦官城在望蜀皇陵畔日西淪

嘉成道中

武侯祠

用杜甫韻

清曉驅車特地尋一林秋柏氣蕭森草凝龍野玄黃血蟲咽琴堂靜遠音要見  
輔成昭烈業應知都出澹寧心英雄到此休垂淚好向隆中養聖襟

成都十詠

帝子當年剏建成明清遺跡尙縱橫民權君主今非昔百姓尋常掉臂行

王城

佛脚猶傳蜀眼靈慨逢僧樹又凋零登高此亦慈恩塔野菊離離薦晚馨

大慈寺

草堂詩聖久蜚聲千載猶留古刹名遙映桃潭秋瑟瑟浣花谿韻倍淒清

草堂詩

受地唯松獨見貞秋春冬夏總青青而君萬物超然悟自正因能正衆生

皮屨居士林中

宴坐

何處文殊妙智尋且來精舍息空林涼生十畝菁菁竹到此能消熱惱心

文殊院

北來威鳳欲何之翼翼先騰七寶池舍利塔巔秋月淨紫霞山翠湧禪思

寶光寺

漁陽鼙鼓破承平動蹕新都萬里程叢桂映湖秋菊瘦古今興廢感何勝

新都



茂林叢翠遶橫山第一禪通向上關昭覺天童兩圓悟高風終古少能攀

昭覺寺成都佛學社

百族同游化樂天法幢高建淨名禪融真適俗行從漸終見因華滿普賢

龍藏寺

### 四川歌

四川一大盆成都一中盆邑鎮皆小盆邱壑無數盆輿誌稱溢地宛然名實存  
莽蒼施宜接東進巫峽門皓潔康藏映西來青海源北趨秦隴洛南挾湘貴雲  
水終滄溟入氣欲吳越吞閬巴旣仙苑益州真錦園青城八百里寧極在深根  
峨眉五千丈金頂星可捫四時別涼燠一日異晨昏古初不可聞鶡啼杜宇魂  
治水賢李冰宮祠川主神鄴都鬼王蹟魚腹白帝痕油浸張飛頭蒿沒劉備墳  
奇才諸葛亮曾此策三分古近桀敖者割據何紛紛思想鑿混沌道術探崑崙  
過橋相如賦投閣子雲玄文章三蘇大詩酒李白尊佛刹多鉅制雙桂流芳芬  
工商繁盛市華洋風化溷精神獨到處煥發在農村整治無穢麓况復有蕪原  
細耨深耕遍斯民樸且勤乃知國本在元氣猶淳渾

嘉敘瀘渝道中

直下岷江向敘州竹根灘外老龍愁青山兩岸忙迎送已過重重急水流  
兩水滇黔出敘瀘交通三省此中樞連綿不斷山如帶小普陀堪入畫圖

重慶雜詠

逍遙偶與老君遊俯瞰江城枕碧流黃葉兩山凝瑞氣特尋真武訪真修

南岸

路關巖開市尾長嶺頭遙指木牌坊佛圖雄據天之半眼底江山接混茫

西郊

疎林黃葉入初冬面面雲山現睡容麥隴菜畦飛嫩綠華嚴佳趣溢禪農

華嚴

溫泉峽上溫泉寺新闢園池浴德全花洞遊歸探石像水聲山色月清妍

北溫

雪竇爲石侯畫師題山水

辛未

摩雲削玉崖千仞飛雪噴珠瀑一簾亭外好山看不足臥聽春雨夜湛湛  
溪風習習一舟橫岸柳邨煙嫋嫋輕近水遠山詩意滿小童烹茗報新晴  
萬山露骨呈秋色一樹濃粧鬥夕陽最愛清風明月夜半溪雲影掩山光  
峯巔積雪飛晴白岩畔高松挺曉青數杵鐘聲聞遠寺悠然策杖過林垌

仿宋覺範禪師畫梅贈奉化蔣公

三冬寒徹石門禪，傲雪凌霜道骨堅。聞說石奇今再世，故應開在百花先。

天童寺訪圓瑛方丈

小白山前少白河，迢遙一塔映清波。輕烟處處浮村靄，微雨絲絲起櫂歌。直揭嶺雲露峯髻，深披林翠探禪窩。五年不入天童境，人事滄桑變已多。

爲蕙庭題照

忽然伸手拓虛空，頓覺身窮道不窮。那有心光遺物外，偶留形迹寄人中。衣寒切感風生北海曙，遙觀日出東三世。十方融一念，更無餘事問天公。

北平雜咏

青邱綠野抱農邨，一角園林向曉曛。却憶嘉陵江上浴，清池同此水微溫。

溫泉

昌平遙接十三陵，直達長林最上層。明帝清皇莽遺碣，於今憑弔屬閒僧。

明陵

居庸天險稱南口，鐵道縱橫血戰場。佛寺於今崇大妙，願教常護吉祥光。

南口

沙河分渡趣湯山，行樹深深碧港灣。臥聽蟬聲新浴後，世間塵慮一齊刪。

湯山

紅螺山

夕陽山頂豔紅螺星斗寒沈戎夜歌三諦一心三觀境阿彌陀佛更無他  
辛未河南雜詠

載將明月渡黃河窗外橋欄取次過微浪輕車聲和答靜聞心海湛靈波  
城中鐵塔一佛峙城外磚塔千佛環十里農村蔭全市雙湖日月懸中山  
殷墟甲骨考遺文石刻紛紛出古墳爭得佛鐘爲國寶鼎盤銅綠燦霞雲  
洛陽山水似泉州也有長橋跨碧流飛向龍門一憑眺佛巖伊闕挹靈修  
白馬馱來漢代經佛傳東土到而今廢興曾歷二千載塔寺荒涼尙可尋  
度陝經嶠入靈寶猶龍曾此著玄玄於今函谷關空設天馬飛騰踰嶺巔  
閩鄉野植垂秋雲兩岸黃河豫晉分幾度登山又臨水飛沙漠漠天昏昏  
辛未陝西雜詠

潼關天險今猶昔隔岸風陵古渡橫三省此爲交切點憑高一望百威生  
西望華山聳翠華華陰華嶽廟嵯峨半空擎出仙人掌散落芙蓉朵朵花

異姓唐王郭子儀汾陽遺跡尙依稀赤溪集外渭南邑渭水清如太古時  
古鴈門外鴈溝在綿邈臨潼山勢賒一浴華清勞累盡驪山回首夕陽斜  
昔年掩室補陀蘿曾供樊師設利羅二十年來大興教乍從初地拜靈柯  
杜順清涼塔尙留華嚴禮罷禮牛頭少陵原上詩人祀十里樊川秋景幽  
大雁塔連小雁塔大興善寺在其間可憐東密策源地一角青龍夕照殷  
南陽古有臥龍岡西安今有臥龍寺西安地主南陽人臥龍臥龍竟何似

終南遊

去秋西入蜀今秋西入秦入蜀曾踐峨眉雪入秦欲奉終南雲小停汴鄭度伊  
洛彷彿武漢趨沙荆漠漠陝州道亭亭宜昌城靈寶過函谷三峽經彝陵夕泊  
巫山狎激灑午輟潼關摩峻嶒華嶽俯瞰長安途灞橋網川張畫圖萬里橫秦  
嶺入河繞古都寂靜同真際園林發妙花東道主人康居士終日追陪遊興賒  
高登雁塔望南山隱約長驅車漸漸向峯頂幽泉潺湲林蒼黃暮宿圓覺禪心  
暢老衲談笑時抵掌詰旦朝大臺霜鐘送清響岡巒起伏陳奇態川陵混茫拂



衣帶文殊最孤峭靈應亦瀟洒遙矚捨身崖還陟兜率階險絕麗絕數觀止老  
虎窩下錦繡堆高低遠近十三臺星拱太乙峯出入往來七十二峪僧集大茅蓬  
石門叩蘭若谿徑訪裴洞白雲紅葉恬詩魂曉雨驚破遊人夢澧峪阻風雨後  
菴幸後安淨業果然業清淨山林變白鑪鼎寒天晴踏雪出山去山外泥瀟行  
欲留回首終南青未了悠然高歌終南遊

雪竇贈某君

四登雪竇初飛雪乍惜梅花未放梅應是待令寒徹骨好教撲鼻冷香來

普陀次何玉書居士感時韻

掛搭瀛嶠偶避寒風和日暖輒憑闌頻聞海市傳新警強向書城索古歡深達  
法空成佛易橫生我執做人難世間情器原唯識誰肯平心一例看

偕李了空居士赴廬山度夏

壬申

孤月繁星檻外天大風吹入室中眠遙尋夏日清涼趣倍覺廬山面目妍綠水  
白雲相蕩漾青林紅屋門嬋娟形神一寂心源朗境奪人空亦了然

大漢陽峯長謠

不登大漢陽峯頂終恨未窮廬山景晨起日朗天地清乃發勝心探玄境穿越  
蘆林金竹坡白雲片片青空迴奇秀旁挹上霄峯雄峻迴盼牯牛領雲中建寺  
堪潛修仰天有坪通捷徑轉折斜出小漢陽忽焉迸露湖光炯最憐小大漢陽  
間東西舒然貫橫綆

度小漢陽以趣大漢陽有綿亘數里之長壠壠上看廬山全境以大漢陽獨攝西南角諸巒以小漢陽仰天坪牯嶺鈐岡嶺大月山含鄱嶺五老峯蜿蜒西北東北東南角而

攝諸巒以茲長壠為橫綆而連鎖之形勢最為瞭然

行達大漢陽峯麓輿棄於地夫啖餅子身呼之推挽登勤勇

精進奮威猛匡君招手烟雨中披拂烟雨踐泥瀟卒造匡廬最極巔形疲彌覺  
神閑靜極顛坦坦何所觀翠松蒼石相彪炳天鏡石下袈裟泉禹崖雁池俱渺  
溟祇覩今賢林與王層臺高築孤碣挺升臺徙倚天香爐下視濛濛悵瀕洞此  
開彼闔遷晦明纔陰俄晴換炎冷多謝山靈百態陳終豁雲霧臻大翕遠山不  
盡江千里繁嶼無垠湖萬頃北岡蜿蜒似臥龍五老昂首睡初醒南巒錯落星  
斗沉紫霄黃巖揚俊穎俛仰徘徊成獨賞默然曠覽忘晷永三界假立唯意言  
聊托長謠煥心影

過上林俟大智訪散原詩文

偶然步上香爐頂擲筆峯前立片時  
草浪風濤莽騰嘯山光雲影漫推移  
蟬喧竹徑添涼意虎守松門訪老詩  
談久渾望歸路遠神清貌古憶仙姿

題何纂甫所藏百駿圖

洗出神姿百駿揚人間也感歷滄桑  
問誰牝牡驪黃外放眼悠然到大荒  
題李協和所藏王茂京富春畫卷

逸氣脩然吐筆頭珍奇自合伴行舟  
富春山水縈懷久展卷先容作臥遊  
用白香山宿大林寺韻題花徑景白亭

雜蒔花木晉曇詵逗得唐人詠盛開幽徑  
千年披一旦春歸重轉大林來  
次李協和韻題一禪廬山畫冊

世間本是一張畫畫到家時畫卽真  
畫上憑君還作畫廬山同作畫中人

游珞伽山步唐法化原韻

扁舟曾狎白鷗閒十載東湖憶昔顏  
應是珞伽原佛地但能清曠卽靈山  
天人

冉冉雲間閣仙子  
傚傚舞水灣  
四野愁塵飛  
莫到無心庭  
草不須刪

漢口乘飛機至重慶口號

擊水大鵬扶搖上  
御風列子逍遙游  
方圓天地懸衡在  
紆曲江山直徑悠  
飛渡田田青塍密  
俯看朵朵白雲游  
一堆村落一堆市  
過鳥何曾影迹留  
轟轟天鼓振晴雷  
巖壑千里眼底開  
水脈山筋齊顯露  
險灘幽峽細徘徊  
提攜萬嶺隨江轉  
拱揖羣峯讓路回  
莫訝神通偶遊戲  
雲端跌坐又西來

壬申秋縉雲山漢藏教理院開學

溫泉闢幽徑  
斜上縉雲山  
巖谷喧飛瀑  
松杉展笑顏  
漢經融藏典  
教理叩禪關  
佛地無餘障  
人天任往還  
九峯開佛刹  
雙柏閱靈宮  
鱗塔傳殊古  
獅峯勢獨雄  
海螺飛翠靄  
蓮髻聳晴空  
無盡江山勝  
都歸一覽中

癸酉春冒雨觀瀑飛雪亭

癸酉

壑雷隱隱雪霏霏  
冒雨來觀瀑布肥  
激石騰如珠鳳舞  
盤空化作玉龍飛  
野花

三兩吐紅潤春草淺深接翠微  
藪藪松枝風過處曲欄徒倚濕沾衣

次原韻贈吳東邁

四明山色正春妍飛雪來觀千丈淵  
策杖更尋雲外趣野花含笑鳥談玄

癸酉仲夏游虞山宿破山寺

古寺沿溪入深林曲徑幽破山山更好  
興福福常留日照亭新築潭空水又流  
宋梅伴唐桂佳景在春秋

破山曉發聯珠洞

萬木藏羣墓葱籠氣鬱森  
筍輿穿綠巷竹杖策青岑  
小憩聯珠洞微聞滴水音  
泉中拾赭石龍血尙泔泔

藏海寺登虞山最高峯齊女墓過拂水巖出劍門

如何藏海寺獨得祖師名  
齊女擁高髻大慈遺化城  
劍門兩湖映拂水一巖晴  
迢遞下山路田衣眼底橫

寶巖寺過小雲栖石洞



未到寶巖寺先過寶石灣倚山錦屏繞隔樹玉湖環香積飽禪悅雲栖絕市闐  
黝然雙石洞寒氣砭肌顏

經龍廟中峯入三峯寺

白龍不可見掉臂過中峯氣象三峯壯宗風一代雄祖堂謁遺貌禪偈演枯松  
古畫摩挲遍煙嵐隱暮鐘

虞山常熟縣城

城郭依山半江潮入海陬名著周虞仲學尊言子游鐘聲傳遠寺塔影臥荒坵  
萬竈迷煙樹斜陽翠欲流

含鄱口與孝園居士望廬山南谷

含鄱塞雲霧南谷忽開朗菩薩發勝心山靈應如響於茲建覺場斯願必圓暢

白鶴澗

羣巒舞青鳳一澗飛白鶴常轉妙法輪清音振山谷

萬杉秀峯歸宗游

不見萬杉影惻然懷萬松匡廬挹奇秀更轉山一重夜宿青玉峽曉發金輪峯  
仰觀峯頂塔萬法此歸宗

和許公武劍峯韻

法界圓融一卽多心安當處息干戈太平寰宇留雙劍卓立虛空不用磨  
張文白招集花徑分均得恨字

花開花謝異欣厭春到春歸紛願恨豈知萬花乘四時榮悴總是天行健

和韻答孝園居士

悟徹緣生卽不生性天心月自清瑩堂堂般若金剛劍永鎮乾坤護太平

次韻答趙敬謀

海上昔曾遇山中今又逢音容似相識萍水認前蹤拂拭匡君面捫摩謝客胸  
此心本無住緣在卽成宗

癸酉夏集廬阜萬松林

以晉釋慧遠游廬山詩分均得希字

匡山靈秀掩炎暉長夏清涼世所希天籟松濤寄吟歎物情生理究玄微濂谿

雅化淵明蒹葭社風規慧遠依白鹿更聞絃詠作好從耕讀振前徽

曉坐大林寺游泳池

潺湲靜契流中韻燦爛激瑩水底霞別有一般清氣味逗人心地茁靈芽

遊武昌九峯山口占

朝氣迎秋爽輕車挹曉涼瑜伽山隱約彌勒閣番皇寶蓋導前路金弓倚後方  
九峯開律寺草木也生香

題戒非和尚拂水山居圖

羨聞虞仲託高蹤春日攜筇齊女峯近挹湖山舒倦臂遠吞江海盪吟胸晴空  
雨拂巖前水平地濤翻嶺上松最愛劍門回首望雲間飛渡數聲鐘

三天竺訪三生石

三天竺畔三生石一徑秋林策杖遊如有精魂呼欲出白雲黃葉意悠悠

登六和塔

名剎杭州數六和巍然有塔傍巖阿登臨一覽江山勝浩浩天風發嘯歌

偕王芝如訪西湖許鐵巖墓鐵巖故越中開元寺僧

越州故友王芝如，如得得雲林訪我居。忽憶鐵巖許烈士，玉泉亭畔一長噓。

贈咫園老圃王芝如

並耕君是許行徒，簞笠飄然映鑑湖。果熟蔬肥蜂釀足，咫園高詠續陶蘇。

詠白雲和少庵韻

白雲終古抱巖石，偶爾隨風出岫飛。小作疇霖慰農望，忽留潭影亦天機。悠揚  
溪上清泉韻，掩映林間明月輝。畢竟閒情多逸致，不辭故故叩山扉。

癸酉冬雪山植樹七律

溪風習習水淙淙，曳杖飄然過伏龍。寺內曾栽司令柏，橋邊待補翰林松。翠光  
迎納山曠暖，寒色飛侵瀑雪濃。老樹不刪成古趣，且將新植課寒冬。

宿鳴鶴場金仙寺

背山面水金仙寺，形勝雙龍護一珠。放步眠牛青草地，衝寒觀鳥白洋湖。九皋  
鳴鶴遺亭在，千竈騰煙成市初。卽此人間開佛國，扶搖直上作南圖。

鳴鶴場赴五磊靈山寺

孤鶴曾聞鳴九皋，杜湖行盡接岩嶢。  
連綿不斷三山遠，卓立無依五磊高。  
一路松篁青嶂映，數聲鐘磬白雲敲。  
天花散作靈峯雪，策杖尋幽興更饒。

五磊曉發

五磊飛微雪，千峯盪暮鐘。  
枕寒清夢徹，窗曉白光溶。  
開遍瑤花樹，門殘銀甲龍。  
行將下山去，白霧尙朦朧。

慈湖赴西方寺轉淨圓寺

慈湖一水派，汶溪捷足西方徑。  
不迷細雨輕風清，趣永蒼煙翠霧妙。  
心栖廿年重覩前塵影，暫坐如聞花鳥啼。  
午柳聲中茶飯罷，淨圓頓轉出恆溪。

甲戌元宵妙高臺觀月

妙高臺上碧虛涵，清淨琉璃寶月含。  
龍澗二潭流識藏，蓮峯八葉展心函。  
微風翠顫聞天樂，萬象光吞證密嚴。  
數春寒忘夜永，倚闌振吼奮獅巖。

應城卽感



挹將秋爽洗炎災喜見荷花雨後開橫渡三河越雲夢新晴一路絕塵埃膏鹽  
遍地生機溢早潦宜時氣候恢富庶聲中絃誦作清音遠渡妙高臺

浴應城溫泉依李白玉女湯詩韻

地心鬱神火水脈潛靈川既濟得竅穴湧爲玉女泉沸泡噴貫珠蒸氣騰活煙  
浮藻藏黑鯽微波漾碧天虛澈涵衆妙適存皆自然滌蕩除疾瘍生化本相連  
輔之以人巧形充德乃全砌池構旅舍臥聽流潺湲築場勤農事灌注成良田  
輪蹄任厥便四達無所偏仰觀秋月圓明鏡耀幽涓

應城溫泉池上曉起作

金烏日暮觀升墜玉兔晨昏見墜升終古如梭忙不徹浮生若夢覺何曾醒來  
物物隨心現睡去塵塵舉念沉習境移情無定性游魚活潑在溫層

應城公園待月

瑞雲捧圓月時呈半面看偶然全露處似在亂峯端天迥團圞淨秋清笙管寒  
香風拂花影光滿大千寬

重九雞鳴寺豁蒙樓登高用杜少陵九日分均得辰字

尚餘羣盜又佳辰國難天災歲歲新未必登樓能遠避聊因高會發嘖呻曾聞  
佛智基悲憫賴有賢才耐苦辛早得瘡痍成一洗優遊好作太平民

秋盡回雪山卽事

乍見秋林五采呈青黃紅紫一層層曉晴山色豔如錦夜靜溪聲冷未冰塔鎮  
含珠新築築池開圓鏡舊呼稱會看時木十年後無限葱蘢佳氣騰

縣府方以武嶺  
農場至雪竇寺

爲風景區計  
對植樹木

弔周湘舲

劇談抵掌淨慈寺探勝同舟秋雪庵如有吟魂呼欲出月明孤雁度寒潭

答玉皇方丈過訪

應夢名山住高風愧昔賢一巖青象伏千丈白龍懸忽遇雲林友來探雪竇禪  
笑談深霧裏不昧性其天

麗水之遊十絕

纔過娥江日已斜一溪清淺映飛車山迴水轉疑無路竹暗松明又幾家

曹娥向嵎縣

楓葉秋聲紅正肥嵎山寒翠撲征衣世間多苦此長樂何事夷齊歌采薇

嵎縣至長樂

東陽錯聽作東洋暮色蒼茫過永康飛越萬山重疊外佛聲歡動縉雲鄉

東陽永康至縉雲

雲

仰觀夾嶺俯深淵月出高山印麗川曲徑沿溪行欲盡廣原如在萬峯顛

縉雲至麗水

三巖四洞石嶽欹珠瀑舟泉各擅奇此地頻添新氣象東南周覽悵延期

三巖寺

歷盡長街又出城扁舟渡我向南明登山少坐青屏下獅象騰歡笑靨迎

山南明

天半鐘聲落石梁一時緇素集諸方中興古剎開嘉運仁壽同登說法堂

仁壽寺講經

萬千氣象法王宮煙雨樓臺蔽太空何限古今興廢感一碑松雪記中峯

萬象山崇福寺

古寺遺踪覓洞溪水環山峙翠雲低如何不見如來相只剩邨姬野叟栖

洞窰寺

清晨獨上鐘樓去試聽鐘聲振十方坐看林煙飛漸淡萬峯嵐翠浴初陽

南明鐘樓

### 赴漢皋舟次

檻外輕舟數葉微銀帆片片挂斜暉江波激灩隨風起水鳥翩翩掠浪飛短塔

蒼茫孤岸迥遠山寒瘦衲衣肥連年旱潦災頻襲猶見殘邨野草依  
楚江音訊感頻催千里衝寒得得來偏是臘深天未雪早曾葭盡猶無灰斜陽  
影落坡間塔隔岸香浮月下梅長笛一聲舟又動沸茶新煎且傾杯

臘月十八剃鬚漢皋

此身四十六初度母難空添德慧無且幸猶存真面目莫教孤負好頭顱不因  
剃髮除煩惱那藉留鬚表丈夫此日刮磨重淨盡露堂堂地證今吾

乙亥三月偕沈仲鈞黃清渠游天臺山

乙亥

細雨輕雲也自宜上天有路莫驚疑偶從會墅嶺頭望百道飛泉界翠畦  
大地春深芳草綠一山豔絕杜鵑紅梯雲躡霧盤空下無限平疇度晚風  
萬松徑外國清寺古木森森護碧溪一枕覺來風雨止泉聲謾謾曉鐘清  
抖數春寒聽曉泉野紅寒翠總清妍金雞嶺上風光好曲徑通幽到塔前  
廬阜空傳三石梁爭如台嶽石梁長聖居方廣上中下不捲珠簾透佛光  
四門九峯孰爲主華頂乃是天台心咒開烏雲見白日惜未靈蹤覓拜經

嘉興遊踪

綠陰蟬噪沁吟魂長石橋橫郭外村新築沿城車路就楞嚴直達古山門

嘉興楞嚴

未許精嚴守護嚴釋迦無語但花拈可憐經閣塵封處隔斷高牆避世嫌

精嚴前後

一櫂清波隔岸通樓臺擁翠坐空濛鴛鴦不見飛煙雨只有蓮花映水紅

煙雨湖樓

月河清淺淨無塵佛性光明現月輪爲憶參差三塔影扁舟繫問水之濱

月河三塔

真如廣福西東塔一例荒寒待復興獨喜祥符春意暖住持曾得苦行僧

真如廣福祥符

嘉興佛剎楞嚴最三日楞嚴講已周短舫輕軺遊亦遍更無餘事掛心頭

楞嚴講畢

莫干山度夏

五絕八首

人行在半山人語聞深谷清風披幽篁細涼生嫩綠

淺黃深碧間明霞吐紅豔曉氣清且佳悠然成獨見

遙觀煙雨飛近感雷電迫長虹升東南夕照沉西北

日沒咽林蟬雨止鳴砌蟲風聲樹颯颯月色空濛濛

蟬潮平旦發松露侵晨滴簾映遠山青窗搖修竹碧



夜聽傾盆雨曉觀磨劍池一亭深竹外無語獨栖遲  
袁公舞折枝越女忽得劍上下雙白龍飛鳴不相見  
豔麗訪潘榭高雄登塔山一覽蒼茫盡迴翔怪石間

銅官石嶠之遊

五絕四首

輿穿竹徑過忽聞泉聲縱溪山迴旋間如迎亦如送  
漢時采銅處唐代名銅官內外銅山寺猶留銅井寒  
箕筥千萬竿綠陰蔽雲日未登仙石橋先賞仙人石  
出嶠流愈肥入嶠竹彌瘦幽洞憩石梁身意清涼透

無錫紀遊

錫山無錫密人烟遍地清漣湧惠泉毓秀鐘靈源有自工榮商茂溯農田

無錫市

三义河上峙圓墩面面靈通播佛恩法界混融無障礙一門超出攝多門

圓通寺

惠泉山下昔曾遊彈指光陰十歲周山色溪聲依舊好渾然萬花與同流

惠泉山

疎林漠漠吵秋蟬一塔峇嶢倚碧天俛覽蒼茫煙雨盡麓園小憩意冷然

錫山塔

曲徑通幽古寺尋深深覺路入林岑人間到此塵囂盡應發菩提向上心覺聖寺

指點紅羊劫燒痕惠山無寺額猶存好從不二法門入常念白衣觀世尊白衣菴

雲橫龍渚慶澄瀾吞吐湖光氣象寬早識惠農能富庶那應西化羨全盤龍頭渚

靈泉一杓此探源路轉林迴別一村占得湖山佳勝處廣開三寶福田門廣福寺

窗有微明風有聲淡雲密鎖月無形幾回起視深宵盡忽已農鐘報五更廣福寺 中秋

有心待月月深藏策杖臨觀曉色蒼晴雨晦明多變化古堤新築細推詳龍頭渚 曉行

環湖闢路建長橋鑿院錐堅苦力招入二洞開飛蟠竦遊仙從此樂逍遙長橋

身退功成范大夫泛舟遺蹟着蠡湖園亭益顯山川勝構作天然大畫圖蠡園

### 宜興二洞

環湖路多曲貫通錫武宜傍山或臨水平野每逶迤先尋善卷子入洞繞須彌

蘊火噴石乳巨形幻象獅菩薩與羅漢飄飄凌雲飛洞中更有洞右轉升層臺

百怪紛隱現穹頂雲樹垂左旋降水洞溪聲喧如雷東出峯露髻西進流盈陂

容與乘一舸二灣窮其湄中灣朝萬蝠壑口波漣漪登岸闢幽徑古剎深林披

世外桃源覓庶幾其在茲地主儲居士殷勤指導之飽以胡麻飯談吐雄且奇  
次訪庚桑楚前亢而後卑自下以溯上乃遇庚桑居海王構靈宅闕肆張瓌琦  
譎詭眩千態飛動呈萬儀於是歎觀止回車重驅馳罄山古禪窟瞻仰夙所期  
近年興佛學亦頗聞龍池日暮未及去再遊待後時桃園駐夕照長途歸忘疲  
廈門次虞愚詠曇花

一現曇花豔當夕千林霜葉競深秋青天碧海茫茫感明月清風渺渺愁未許  
波紋生古井閒看塔影臥荒邱豪懷已逐韶年逝濯足滄浪萬里流

南華四絕

壩上青山橫馬鞍讀書聲度曲江寒一林楓葉紅如許當作江南秋色看  
光華亭外曲橋橫初聽曹溪流水聲塔影林暉遙掩映象山形勝自分明  
蒼巒雨洗曉寒添一禮真身意灑然後有憨山前智藥共存菩薩願行堅  
南華禪趣溢農林卓錫泉清策杖尋靈樹雲門無盡藏心光直透古威音

此下失  
羅浮十

白雲山憩能仁寺和金芝軒韻

別白雲山廿四年萬峯重見接青天依稀跡認雙溪舊變幻多端古刹前俗化  
混言歸大道靈源孰悟到真禪能仁共向深稽首待看當空日朗然

偕遊蘿岡官橋次鐵禪長老韻

超山千里冷香寬雪裏春光二月寒今日蘿岡冬未盡繁枝已向隴頭看  
新桃源裏老僧家待得花開似絳霞更願湖邊建蘭若白沙堤上會無遮

溥常長老囑題七塔寺志次水月上人六十感懷原韻

丙子

勤磨古鏡發新明幻作人寰一化城盡導迷流歸覺海更憑仙筆暢文情廢興  
舊事殷殷紀緇素遺聞細細評珍重甬東流七塔天童雪竇共長庚

次芝峯三十五初度韻

人間佛國願何賒理本如如事尙遮染淨一心須轉變自他三密待交加空漚  
儻殞圓澄海露地堪馳大白車好向雪山慈氏奉坐看覺樹燦龍花

丙子夏於焦山定慧寺曉起

江上晨風拂袂寒急流聲裏一蒲團返聞忽已根塵脫宴坐華嚴法界寬  
和潘對鳧居士

重陰剝復忽聞雷世界光明一綫開欲起沉眠破長夢笑從前劫證餘灰東方  
德化全球遍有脚陽春大地回人海慈航誰駕得天行不息健翁來

贈靳翼青居士

偶坐幽溪石如聞太古琴微風生細浪疎木發清吟恍若水中月朗然空後心  
分明本如是那用更推尋

遊瑞巖寺

天風浩蕩穿霞浦秋氣淒涼向瑞巖五色靈芝尋未得蓮峯十二翠烟含

天童寺八指頭陀植柏

煨芋重參八指禪梅花明月自超然卽今手植婆娑柏翠稍臨風已拂天

淨心老和尚八十一重遊放羊嶺

八十年逾老趙州杖藜重作放羊遊飽餐蘿蔔花生薯一路香飄桂子秋



丙子九望妙高台觀月

微茫翠靄萬峯浮地曠天清已暮秋  
謾謾松濤助吟嘯妙高臺上月當頭

祝蔣公五十壽辰

乾坤鼓鑄杖風雷一代權威泰運開  
直欲聖賢承道統豈惟軍政展天才  
國家正氣懷興復民族頽流誓挽回  
薄海同伸知命慶金剛不壞仰如來

南高峯望湖上諸山

畢竟南高抑北高玉皇含笑美人嬌  
雄獅一吼羣峯上無限秋風木葉凋

黃龍金鼓紫雲棲霞四洞

昔日黃龍度呂巖黃龍今伴呂巖龕  
斜穿竹徑敲金鼓雙洞雲霞古氣涵

初陽臺葛嶺保叔塔

初陽臺上小徘徊俯覽江湖意象恢  
一掬葛翁丹井水嶙峋怪石塔崔巍

龍渚四入初度

龍渚扁舟橫太湖每依山水寄清娛  
人間四入今初度世界三千渺壯圖

題粟翁手繪靖節故事

粟翁高致古誰如官舍辭歸老樸廬只有陶公堪比迹閒揮逸筆寫清疎  
丙子釋尊成佛日用柳亞子韻題秦效魯佚園

攝取瀛寰九九州佚園清賞足神遊四時涼燠唯心現百物新陳大化流豈止  
蔭成堪息影也曾狂歇不迷頭偶來暫借蒲團坐曉聽林禽引吭謳

張漢卿邀遊徐鳧巖

丁丑

重覩丹山赤水流徐鳧巖下逐魚游春光過半清明近生趣泱然翠稍頭

張漢卿邀自亭下乘竹排至沙地

宴桃花間  
用前韻

悠揚妙樂激湍流溪上偕乘竹筏游萬樹桃花灑紅雨無邊春色溢枝頭

梅墟靜宗寺講般若三宿

唧唧蟲催閣閣蛙客牕禪火吐靈葩偶來綠野留三宿閒地滋生般若芽

梅墟塘頭曉步

積雨新晴向曉暉碧畦千塍嫩秧晞江潮落趁塘頭寺影事前塵認己非

蕪湖遊

浴罷新華月已高乘涼策杖赭山坳登堂中山堂一覽蕪湖市江樹微明咽綠濤  
長吸洪波伸一磯絳樓隱隱翠微微網羅救放雙鱗脫歸路冷然涼雨飛

巢縣遊

層巒疊嶂映巢湖欲比芙蓉浸玉壺最愛臥牛山上望波光林翠湧浮圖

合肥遊

合肥宰相名天下包孝肅李文忠猶見山清水亦腹弩盡教明臺永固剝塵塵剝炳真如

明教寺故  
教勞臺

威鎮逍遙尚有津林端曉色一川新包湖畢竟清無滓採得蓮根亦絕塵

無為遊

沂堂春上集英耆古寺東西法味資恰好芝山繡溪畔民風淳樸樂無為

廬山住茆卽事

傍溪把茆蓋宴坐來怒號急湍喧日夜叢翠撼風濤祇此動皆靜更何禪可逃

廬山煙雨外遍地陣雲高

心海騰宿浪風雨逼孤燈卅載知憂世廿年勵救僧終看魔有勇忍說佛無能  
擲筆三興嘆仰天一拊膺

題奉賢王氏野園

養老由來貴佚神野園佳境足娛親一家上善能俱會更種蓮花骨肉因

丁丑秋示渝州緇素

身空莫卽方成佛佛本無成始卽身顯密聞名今謝矣不從明鏡更添塵

李園憩遊

松徑微聞蘭氣清涼蟬石屋逗秋聲更看高跨鵝王頸江合山迴攬勝形

赴北碚卽事

斜雨橫風一滑竿嶇崎况值下山難也同國勢阨危甚要仗心堅膽不寒

觀峯亭中秋待月

登亭指點九峯奇已是雲開月出時坐久團圞欣共話渾忘風露夜淒其

浴南泉卽景

共泛輕舟向小溪，披蒼曳翠兩巖低。  
我來已植秋遲暮，猶見花灘芳草萋。  
曾來仙女駐遊踪，山下飛鳴雙白龍。  
一浴南泉塵慮盡，了然去住不關胸。

磬室閒居

急瀑聲成催睡曲，溫泉氣幻出蒸饅。  
一居磬室渾無事，飽食安眠儻不難。

嘉陵月夜

江上清風拂袖寒，山間明月隔林看。  
泉聲激越蟲淒切，秋味冷然夢一般。

腊月十八日張茂芹約渝州諸佛子同觀江北平兒院王劭深誦前二句

謂余民入自滬赴甬出淞海時口占渺念前塵切觀當境乃足成一絕

以紀之

一悟恰如初見海，再修還是本來人。  
遍身紅爛臥荆棘，平得兒心民自淳。

兒童節遊北碚

戊寅

百花爛漫眩春痕，最是桐花蕩客魂。  
畦尾壟頭隨起落，竹竿扶我遇山邨。



題王海平所藏澹歸大師墨寶

昔禮天然室高風仰十今浩浩忠義氣迴作菩提心澹禪獨超妙尤能愜素襟  
茲獲親手蹟如聞綠綺琴

戊寅夏五田頌堯軍長招與劉自乾主席暨肇乾立南樹仙瑤笙諸君同  
覽長松靈峯諸勝宿唯仁山莊曉起偶成二律

邇在蓉都古驛東人間淨土有靈峯蹟留馬祖千年寺苞繫龍鱗五老松久晦  
山林今得主多情天地此貽公相偕絕頂扶筇上足踏青蓮碧海空  
山川淑氣靈襟濬陟嶺登峯竟忘勞俯瞰西南蒼野闊近攀東北翠岑高仁莊  
恍已超三界佛刹何妨現一毫夜雨晨風涼徹枕洋洋盈耳是松濤

由灌縣游青城天師洞上清宮川主廟

灌口離堆吐怒潮竹繩迢遞架長橋溪聲鳥語清心耳林翠巒光遠市囂夾道  
松杉初勝引洗塵風雨百靈朝降魔石上天師洞一覽蒼茫寄興遙  
曲徑通幽向上清森森崖樹鎖青城蟬歌鳥語都奇絕白木烏苓選特精第一

峯頭觀旭日無雙景色喜新晴歸途廟貌瞻川主二水中分石堰平

自貢市籌備處長陳頌洛導觀水火井與繆秋杰局長等晚宴釜溪公園  
水火交爲用天然此獨奇巧窺流井妙涼納釜溪宜市政敷新制澁聞拾古遺  
欣逢東道主客路忘嶇崎

歌樂山小住

我來歌樂山深隱雲霧內千里煙雨迷巫峽同沆漭

詠蘭

清芬何處來一蘭茁幽谷襲體生微涼悠然欣自得

重九鍾益亭九老茗敘渝州葛嶺

賴有夔門鎖不開登高客盡避災來消閒葛嶺逢重九同進深深茗一杯

秋杪重慶長安寺雅集分韻得中

越南燕北地皆中何處長安路不通偶寄游蹤巴子國集將吟展梵王宮興邦  
久慨摠多難盪寇今應奏大功一洗人間兵氣盡太平還證佛心同

了空偕登南泉建禹峯

建文已渺冥建禹彌荒遠石浪斜暉翻空臺寒翠掩

病足仙洞了空鶴邨頌洛鍾美肯盒華真唱和以詩至次鶴邨韻答之

一自登峯掬玉泉芒鞋不復趁雲煙屢違石院談禪約猶滯谿灘訪勝船半壁  
琳光騰丈室彌天花雨灑諸賢環吟恍服怡神藥慰病功深入福田

重建瀉山萬佛殿落成

大雄山下轉身來瀉水長流化宇開三度劫灰飛萬物更看彈指現樓臺

貴陽雜詠

纔渡雲海白忽浮山浪青溫熹飛浴裏涼翠接黔靈

倫飛筑

空慕陽明洞未謁陽明祀且喜陽明路恰臨黔明寺

黔明寺

行行貴陽市豁爾已西郊漸入山林勝渾忘杖履勞

黔靈山

夜雨階猶潤天陰路不乾東山一登眺萬竈曉烟含

東山寺

南城迎曦陽忽驚飛炸狂東山趁明月深悲燒夷傷

被轟燒

長憶了塵子結想高峯山遙禮塔無縫未能一叩關

懷高峯

### 黔滇道中

苗女皆尖帽黔山多尖峯夜郎未驚蟄春雷聲隆隆

宿安順

瀑流垂銀練亂世橫黛眉關嶺永寧道盤曲何鬱伊

關嶺瀑

鐵道跨盤江夕陽銜谷口實異名或同安南仍有我

宿安南

重重廿四盤盤遇盤縣境下憑淵壑深上凌雲霄近

廿四盤

貴州此長揖雲南入亦資高溫迎落日一枕夢平彝

宿平夷

菜蕊黃盈野柳條青拂亭江南好春色腊盡到昆明

到昆明

### 昆明雜詠

南秀挺昆明依稀小北平蓮開十刹海鐘度五華清

佛教會

行樹鬱嘉利巍樓暢大觀數帆堤柳外遙映遠山寬

大觀樓

扁舟此西去直指碧雞峯撥翠披雲上林端落午鐘

雲棲寺

造極凌霄閣三清俯太華濤音喧石壁雲海渺無涯

太華山

附詩餘

憶秦娥

甬江重別白慧

春江畔衲衣憔悴曾相見。曾相見暮雲輕斂。暮風微扇。畫梁飛去秋歸燕。聯吟幾度星辰換。千山千水好期重面。

浪淘沙

秋感

思遠更情柔。容易成愁。百年歲月順風舟。烏獲飛廉難挽住。似水東流。大陸莽殷憂。無地勾留。病魂且作夢中遊。曾是幽居多感慨。何況清秋。

疏影

中秋

批風抹月。俄倚徧雕闌。真個癡絕。玉宇瓊樓。無限高寒。欲把蟾桂輕折。問他今夕是何夕。却正是中秋佳節。望不穿。遠浦長空。一片波光。明滅。天際虹橋。廿四襯深青。淺碧。益顯孤潔。忽有清音盪漾。情懷一曲。洞簫吹徹。心心七竅。玲瓏跌宕。飛動生生活活。遊遍了天上人間。早是胸填冰雪。

行香子

焦山春望



雲湧山邊浪湧山邊渺春光浩蕩無邊俯窺大陸人在峯巔看岫生雲雲如浪  
浪搖天雲斷還連浪碎還圓遠凝眸細草芊綿喜高花大柳香染絲牽且酌  
杯茗吟佳句炷爐煙

菩薩蠻

海樓春晚

疏林漠漠游絲織春山數點嵌空碧滄海一危樓憑消萬古愁風高浪腳立  
日暮雲頭急鳥倦滯歸程一枝一旅亭

鳳凰臺上憶吹簫

喜健菴重訪普陀疊在京口見懷韻

海外仙岑人間佛國白華紫竹堆堆恍蓬萊清淺金碧樓臺多有蓮花淨侶控  
青鸞黃鶴飛來閒消受茶清香靜幾度徘徊感深中州上士疑再世蘇髯只  
是憐才思平生道誼真個陳雷千里兩番風雨灑清言開我襟懷儻能使懺除  
綺語超出塵埃

滿紅紅

喜慈社多出關見過

千日關期圓滿也看搏鵬息喜昨覩春風顏面豐華逾昔海上閒居饒逸趣人

間流譽多知識終有時象擲與獅拿君休息  
觀幻化忘羅織離妄想清心跡  
伴爐香蓮漏足消長日一出剛逢菩薩誕重修要使天魔泣只眼前憐取菜花  
黃豈苗碧

鳳凰臺上憶吹簫

與灌菴亦幻同作

人影搖搖燈光淡淡模糊一片沉吟雜零鐘碎梵飛度長林更聽淙淙流水好  
如彈錦瑟瑤琴儻添個娟娟明月豁盡塵襟  
離離一天星斗是點點詩魂燦  
燦來心這雄才奇氣神鬼憑臨一往豪歌高唱恐傾了梅尉仙岑快分付幽思  
清夢莫再相侵

王三昧

甬山頭一塔俯江流祥呈白雀禪參布袋明州十茆三洞望中收

甬江塔

雪竇山曾應宋君夢九峯五巖二十里雲迎送瀑飛千丈玉龍縱

雪竇山

資聖寺明覺顯禪師捷機俊語碧巖集裏曾知天下禪宗繼起誰

資聖寺

上雪峯雲雨阻重重徒殷策杖未能撥破空濛彷彿當從夢裏逢

上雪峯

倒王三昧 甲子除夕

心有天游萬化融風吹雪度長空逆流西上回首大江東歲又終

王三昧 乙丑元旦

乙丑年元旦樂行船風收雨歇昨宵舊染盡湔清朗乾坤新霽天

王三昧

虎邱上生公說法堂點頭頑石引人憑眺斜陽廿里蘇城七里塘 虎邱山

寒山寺鐘聲到客船詩字雙絕一碑中外流傳曉色蒼茫憶古禪 寒山寺

寶筏菴廿載一詩龕昔時頻過畫中禪意重參梅欲相將鄧尉探 寶筏菴

報恩塔九層凌碧霄寶坊瓊宇三吳首剎岩嶢玉帶河環一水遙 報恩塔

王三昧 保國寺

靈山古佛殿閱千春嶺環松抱溪聲常轉法輪玉宇瓊樓湧現新

倒王三昧 古靈山觀雪

一臥靈山忘歲暮忽驚白遍深樹珠網羅空法身堂堂露光交錯

下弦月

碧巖下古洞辟炎寒松竹爭翠楓栗飛丹萬峯高擁一樓安第一洞

披翠徑乘興上巖頭晨曦吐豔朝露忘憂一聲長嘯岫雲收二層巖

兩株柏雙飛綠鳳凰冬含日煖夏引風涼秋月春山湛佛光柏光林

磐石上偶坐喜山空明明寶海浩浩天風帝網森羅夕照紅磐石上

憶江南春寒

呵開硯底凍住毫端不信人間春已至重裘猶自怯春寒獸炭一爐殘

念奴嬌莫干山上

莫干山上夏清涼招聚東南文物雨後劍池增勝概雙瀑飛鳴崖壁虹飲霞波

蟬吟竹蔭瓜藕調冰雪布鞋芒笠個中誰是人傑堪憫多難民生頻年憔悴

災又江河發列國爭雄相起仆戰雲天際明滅一念回頭同登彼岸風拂青螺

髮萬峯深處高空獨朗心月